

CARTA VMNÁÁⁿ VMNAAⁿ YEⁿ'E 'IIⁿ'YĀⁿ YEⁿ'E YĀĀⁿ CORINTO

**Pablo idinguúⁿ yā carta 'cūū yeⁿ'e
'iiⁿ'yāⁿ yeⁿ'e yaacū na yāāⁿ Corinto**

1 'Úú Pablo 'úú. Dendyuūs yaa'ví
yā 'úú chi cuuvi apóstol yeⁿ'e
Jesucristo tan'dúúcā chi Ndyuūs
neⁿ'é yā. 'Úú ndúúcū hermano
Sóstenes yaa'ví 'nū ndís'tií. **2** 'Úú
idinguúⁿ carta 'cūū yeⁿ'e 'iiⁿ'yāⁿ
chi i'téenu yā Ndyuūs, 'iiⁿ'yāⁿ chi
snée yā na yāāⁿ Corinto. 'Iiⁿ'yāⁿ
s'eeⁿ, Ndyuūs yaa'ví yā 'iiⁿ'yāⁿ chi
cuuvi yeⁿ'é yā 'iiⁿ'yāⁿ s'eeⁿ ti yeⁿ'e
Cristo Jesús. Idinguúⁿ dendu'ū yeⁿ'e
nducyaaca 'iiⁿ'yāⁿ yeⁿ'e nducyáácá
yāāⁿ, 'iiⁿ'yāⁿ s'eeⁿ chi ngaⁿ'angua'á
yā ndúúcū Señor Jesucristo. Señor
Jesucristo miiⁿ 'iivú Ndyuūs yeⁿ'é yā
ndúúcū s'uūuⁿ. **3** Ndyuūs Chiida yú
ndúúcū Señor Jesucristo cuuvi téé
yā s'uūúⁿ cosa chí n'dáácā n'dai yeⁿ'é
yā, ní 'íícú cunée vaadi 'diiíⁿ yeⁿ'é
yā na staava yeⁿ'e yú.

**Pablo caaⁿ'maⁿ yā gracias Ndyuūs
caava chi Ndyuūs dateé yā 'iiⁿ'yāⁿ**

4 Cueⁿ'é daāⁿmaⁿ ngaⁿ'á gracias
Ndyuūs cáávā cosa chi n'daacā n'dai
yeⁿ'é Ndyuūs chi dátee yā s'uūúⁿ
chi yeⁿ'e Jesucristo. **5** Dendyuūs
dateé yā tanducuéⁿ dendu'ū chi vée

yeⁿ'é yā ti maaⁿ ní ndís'tií ní yeⁿ'e
Cristo ndis'tií. Ní Ndyuūs chinnee
yā ndís'tií chí caaⁿ'máⁿ nī nduudu
yeⁿ'é yā, ní teé yā ndís'tií vaadi
deenu. **6** 'Tíícā chiíⁿ chí 'úú ngaⁿ'á
nduudu cuaacu miiⁿ yeⁿ'e Jesucristo
miiⁿ. Ní ndís'tií n'giindiveéⁿ nī ní
diíⁿ nī 'tíícā, ní chíⁿ'íⁿ nī chí nduudu
miiⁿ chí cuaacu. **7** Ní cuuvi yeⁿ'é
nī nducuéⁿ chí dateé Ndyuūs, ní
ndís'tií nguéeⁿ diíⁿ faltar mar 'áámá.
Neⁿ'é chí ndís'tií 'cuætinéeⁿ ngiinu
nī Señor Jesucristo yeⁿ'e yú chí
ndaa yā taama vmnéⁿ'ée. **8** Ní Cristo
miiⁿ ní téé yā fuerzas ndís'tií, ní
'cuætinéeⁿ nī n'daacā ndíⁿ nguuví
chí Jesucristo ndaa ntuúⁿ yā. Ní
nguéeⁿ vée nuuⁿndi yeⁿ'é nī nguuví
chí ndaa Señor Jesucristo yeⁿ'e
yú. **9** Ndyuūs ní diíⁿ yā chí caⁿ'a yā
chí diíⁿ yā. Ní yaa'ví yā ndís'tií chí
'cuætineéⁿ nī ndúúcū daiyá yā chí
Señor Jesucristo yeⁿ'e yú.

**Vée divisiones nguaaⁿ 'iiⁿ'yāⁿ
chí caⁿ'á yā na yāacū**

10 Ndís'tií hermanos yeⁿ'é, 'úú
ngiicá ndís'tií cáávā chí duuchi Señor
Jesucristo yeⁿ'e yú chí 'cuætinéeⁿ
ngíínú nī, ní nguéeⁿ vée divisiones
nguaaⁿ ndís'tií. N'dáácā n'dai

'cuetinée nī ní daama daamá nī ndúúcū 'aama vaanicadiinūū' ye"e ndís'tiī chí n'daacā ndúúcū tanducué"ē chí dií"n nī. ¹¹N'duuví 'iī"yā"n ye"ē familia ye"e n'daataá Cloé yaa'ví yā 'úú ye"e ndís'tiī hermanos ye"é. Ní nga"á yā chí ndís'tiī n'gēecu cheendí nī. ¹²Chuū chí ye"ē chí caa"má". 'Áámá 'áámá ndís'tiī nga"á nī ye"ē 'áámá sa"ā 'tíicā. 'Áámá yā ní nga"ā yā: 'Úú ye"ē sa"ā Pablo; taamá yā ní nga"ā yā: 'Úú ye"ē sa"ā Apolos; taamá yā ní nga"ā yā: 'Úú ye"ē sa"ā Pedro; taamá yā ní nga"ā yā: 'Úú ye"e Cristo. ¹³¿Áá cuaacu chí Cristo ye"ē yú chí 'yaa" yā? Nguéé 'tíicā. ¿Áá ca'nee"ngá'āa Pablo cáávā nuu"ndi ye"ē ndís'tiī? Nguéé. ¿Áá cheedinuū"nī" nī ndúúcū chí duuchi Pablo? Nguéé 'tíicā. ¹⁴'Úú ca"ā: Gracias Dendyuūs, ti 'úú chí Pablo, nguéé cheedinuū"nī" mar 'áámá ndís'tiī. Dámaā" cheedínuū"nī" sa"ā Crispo ndúúcū sa"ā Gayo. ¹⁵Maa" ní mar 'áámá ndís'tiī nguéé cuuvi caa"má" nī chí ndēedínuū"nī" ndúúcū chí duūchí. ¹⁶Cheedinuū"nī" ntúú" 'iī"yā"n ye"e familia ye"e sa"ā Estéfanos. Ní ye"e taná"ā 'iī"yā"n 'úú nguéé deenú chí ndēedínuū"nī" du'ū ca táámá 'iī"yā". ¹⁷Cristo nguéé dichó'o yā 'úú chí cuēedínuū"nī" 'iī"yā"n caati dichó'o yā 'úú chí caa"má" nduudu ye"ē evangelio chí nduudu ngai ye"e Cristo. 'Úú nguéé caa"má" ndúúcū nduudu deenu ye"e sa"ā ye"ē i"yee"dí 'cūū, ní 'iicu nducué"ē chí nga"á ní ye"e poder ye"ē Cristo chí ch'ī yā na cruz.

**Cristo mii" ní poder ye"ē
Ndyuūs ndúúcū vaadi deenu**

¹⁸'Úú deenú chí taachi 'iī"yā"n chí nguéé deenú yā du'ū chí Cristo mii" ní n'giindiveé" yā nduudu ye"ē

cruz, 'iī"yā"n mii" nacadínuu" yā chí 'áámá cosa chí duuchi. S'uūú" chí nangua"āi yú, deenu yú chí Ndyuūs ch'i"i yā poder ye"ē yā cucáávā nduudu ye"é yā. ¹⁹Naati canéé nguū" na libro ye"é Ndyuūs ndíí vmnaa" chí nga"ā 'tíicā:

'Úú dituūví vaadi deenu ye"e 'iī"yā"n chí deenu, ní idií" chí nguéé dichí'vē nduudu ye"e 'iī"yā"n chí deenu taavi.

²⁰¿De'ē dichí'vē vaadi deenu ye"e 'iī"yā"n chí deenu? ¿De'ē dichí'vē vaadi deenu ye"ē maestro chí deenu taavi? ¿De'ē dichí'vē vaadi deenu ye"é 'iī"yā"n chí deenu taavi ní caa"má" yā ndúúcū compañeros ye"é yā ye"e cosas chí véé i"yee"dí 'cūū? Ndyuūs ch'i"i yā chí vaadi deenu ye"e i"yee"dí 'cūū ní dúú'vī véé ní nguéé de'ē véé. ²¹'Ii"yā"n ye"e i"yee"dí 'cūū nguéé cuuvi n'diichí yā Dendyuūs cucáávā vaadi deenu ye"é i"yee"dí 'cūū. Ndyuūs canee yiinú yā ní nadangua"ái yā 'iī"yā"n chí i'téenu yā nduudu cuaacu ye"é yā, naati taná"ā 'iī"yā"n ye"e i"yee"dí 'cūū nga"á yā chí nduudu cuaacu mii" ní tan'dúúicā 'áámá cosa chí duuchi.

²²'Ii"yā"n Israel s'ee" chí judíos ngiicá yā señales Ndyuūs ní 'iicu 'iī"yā"n griegos ní in'nuu" cá yā vaadi deenu ye"e i"yee"dí 'cūū. ²³S'uūú" ní ca'cuee" yú ye"e Cristo chí ca'néé"nga'āa na cruz cáávā nuū"ndi ye"e nducyáácā 'iī"yā". 'Ii"yā"n Israel s'ee" nguéé ne"e 'caandiveé" yā nduudú 'cūū, ní taná"ā 'iī"yā"n sta'á yā nduudú 'cūū tan'dúúicā 'áámá cosa chí duuchi. ²⁴Nduuti chí 'iī"yā"n Israel s'ee" o nduuti chí 'iī"yā"n griegos, Ndyuūs

yaa'ví yā 'i'i'yā'n s'ee'n chi cuuvi ye^{n'}é yā 'i'i'yā'n. Cristo ní poder ye^{n'}é Ndyuūs ní Cristo miiⁿ vaadi deenu ye^{n'}é Ndyuūs cucááva nducyaaca 'i'i'yā'n. ²⁵Nduudu ye^{n'}é Ndyuūs chi 'i'i'yā'n nga^{n'}á yā chi cosa chí duuchi, nduudu miiⁿ nduudu déénú ca nguée tí nduudu ye^{n'}e sa^{n'}ā ye^{n'}e i^{n'}yee^{n'}dí 'cūū. Ní cosa chi sta'á yā tan'dúúca chi duuvā ye^{n'}é Dendyuūs chííⁿ chi ditiínú ca, nguée ti ye^{n'}e 'i'i'yā'n ye^{n'}e i^{n'}yee^{n'}dí 'cūū. ²⁶Ndís'tií hermanos ye^{n'}é, nadacádiinúúⁿ nī ye^{n'}e maáⁿ nī. Nguée 'yaaⁿ ndís'tií 'i'i'yā'n chi deenu taavi, nguée 'yaaⁿ ndís'tií 'i'i'yā'n ndíí tiiⁿ, ndíí nguée 'yaaⁿ ndís'tií 'i'i'yā'n 'cuiica. ²⁷Ndyuūs ndéevé yā 'i'i'yā'n chi nguée deenu taavi yā ní 'íicú 'i'i'yā'n chi deenu taavi yā cuuví 'cuináⁿ yā. Ní Ndyuūs ndéevé yā 'i'i'yā'n ye^{n'}é i^{n'}yee^{n'}dí 'cūū chi véé duu'vīi fuerzas ye^{n'}é yā ní 'íicú 'i'i'yā'n chi véé fuerza ye^{n'}é yā cuuví 'cuináⁿ yā. ²⁸Ndyuūs ndéevé yā 'i'i'yā'n chi nguée du'ū vee nanááⁿ 'i'i'yā'n ye^{n'}é i^{n'}yee^{n'}dí 'cūū ní ndéevé yā 'i'i'yā'n chi nguée inuuⁿndi ní ya'ai i'inú yā 'i'i'yā'n. Ní 'iicu Ndyuūs dííⁿ yā chi nguée de'ē vee cosa chi ch'ete chí 'i'i'yā'n ye^{n'}é i^{n'}yee^{n'}dí 'cūū dííⁿ yā. ²⁹Tíicā Ndyuūs idiíⁿ yā ti mar 'áamá 'i'i'yā'n nguée cuuvi dich'etē yā 'i'i'yā'n nanááⁿ Dendyuūs. ³⁰Tíicā Dendyuūs maáⁿ yā teé yā vida cue^{n'}e daáⁿmaⁿ ye^{n'}e ndís'tií tí i'teenú nī Cristo Jesús. Ndyuūs dich'óo yā Jesucristo i^{n'}yee^{n'}dí 'cūū chi cuuvi deenu yú nducue^{n'}e cáávā Cristo. Ní cáávā Cristo miiⁿ nguée nuuⁿndi ye^{n'}e yú nanááⁿ Ndyuūs ti Cristo miiⁿ ch'íi yā na cruz cucáávā nuuⁿndi ye^{n'}e nducyaaca 'i'i'yā'n, ní

'iicu s'uūuⁿ chi cuuvi ye^{n'}é yā s'uūuⁿ. ³¹Cáávā chuū canée nguūⁿ na libro ye^{n'}é Ndyuūs ndíí vmaaaⁿ 'tíicā: 'i'i'yā'n chi nga^{n'}a chi idich'etē maáⁿ yā 'i'i'yā'n, nguée n'daacā idiíⁿ yā. Dámaaⁿ canée chi dich'etē yā 'iivú Ndyuūs.

Nga^{n'}a yā chí Cristo ca'néeⁿnga'á yā

2 Ndís'tií hermanos ye^{n'}é, taachi ndāa ní canée ndúúcu nī 'tíicā ca^{n'}á nduudu cuaacu ye^{n'}é Dendyuūs. Nguée ca^{n'}á nduudu miiⁿ ndúúcu núúⁿmáⁿ vadicadínnūuⁿ ye^{n'}e vaadi deenu. ²Tíicā nga^{n'}á, ti nguée ne^{n'}é caāⁿmaⁿ táámá cosa nanááⁿ ndís'tií, dámaaⁿ ne^{n'}é caaⁿmáⁿ ye^{n'}e Jesucristo chi ca'néeⁿnga'á yā. ³Taachi canée ndúúcu ndís'tií ndii cuūⁿnūⁿ 'úú; ní 'va'á 'úú; ní nééné in'duuví vaa. ⁴Nguée nga^{n'}á nduudu miiⁿ ndúúcu vaadi deenu chi cadiinuuⁿ 'i'i'yā'n ye^{n'}e i^{n'}yee^{n'}dí 'cūū, naati nga^{n'}á nduudu cuaacu miiⁿ ndúúcu nduudu chi nguée ngíⁿi. Nga^{n'}á chiiⁿ chi Espíritu N'dai ye^{n'}é Ndyuūs ch'i^{n'}í yā 'úú ndúúcu poder ye^{n'}é yā chí nduudu cuaacu miiⁿ ní ye^{n'}e Dendyuūs. Níicú 'i'i'yā'n cuuvi deenú yā chí nduudu cuaacu miiⁿ ní nduudu ye^{n'}é Dendyuūs. ⁵Tíicā nga^{n'}á ti chííⁿ chi i'teenú yú nguée chiicā na vaanicadiinuuⁿ ye^{n'}e 'i'i'yā'n ye^{n'}e i^{n'}yee^{n'}dí 'cūū ti ye^{n'}e poder ye^{n'}é Dendyuūs.

Dendyuūs dííⁿ yā chi deenu 'i'i'yā'n cucáávā Espíritu N'dai ye^{n'}e yā

⁶Taachi canée nū nguaaⁿ 'i'i'yā'n chi i'teenú yā Dendyuūs ní 'áamá canée yā ndúúcu Dendyuūs, tuu'mi ní nga^{n'}á nū ndúúcu nduudu ngíⁿi

yeⁿe vaanicádiinūⁿ. Nguéé ti vaadi deenu chi nadacadiinúⁿ 'iiⁿyāⁿ yeⁿe iⁿ'yeeⁿdí 'cūū, 'iiⁿyāⁿ chi nguéé i'téenu yā Dendyuūs yeⁿe yú. Ndíí nguéé ti yeⁿe saⁿā chi ndii tīiⁿ yeⁿe iⁿ'yeeⁿdí 'cūū chi ch'ó'oo poder yeⁿe yā. ⁷Naati ngaⁿá 'nū vaadi déenu yeⁿe Dendyuūs. Ní nguéé deenú 'iiⁿyāⁿ yeⁿe iⁿ'yeeⁿdí 'cūū vaadi deenu miiⁿ, ti Ndyuūs caⁿa yā vaadi deenú 'cūū chi yeⁿe maáⁿ yā vmnááⁿ vmnaaⁿ chi din'dái yā iⁿ'yeeⁿdí 'cūū, ní 'iicu cuuvi nadinguáⁿai yā s'uūúⁿ. ⁸Mar 'áámá 'iiⁿyāⁿ n'gæte yeⁿe iⁿ'yeeⁿdí 'cūū déenú yā yeⁿe vaadi deenú 'cūū, ti nduuti chi déenu yā, tuuⁿmi ní nguéé s'neeⁿngaⁿá yā Señor Jesucristo chi chiica yā yeⁿe va'ai chæeti nguūvī. ⁹Canéé nguūⁿ ndii cuááⁿ vmnaaⁿ ná libro yeⁿe Ndyuūs 'tíicā:

Nducuéⁿe chi din'dái Dendyuūs ní yeⁿe 'iiⁿyāⁿ chí i'teenu 'iivú Ndyuūs, tanáⁿā 'iiⁿyāⁿ yeⁿe iⁿ'yeeⁿdí 'cūū nguéé n'diichí yā Jesucristo, ndíí nguéé n'giindiveéⁿ yā yeⁿe yā, ndíí nguéé nadicadiinúⁿ yā yeⁿe dendu'ū chuū na staava yeⁿe yā.

¹⁰Ndyuūs ch'iⁿí yā nducuéⁿe s'uūúⁿ cucaavā Espíritu N'dai yeⁿe yā. Espíritu N'dai yeⁿe Dendyuūs ní deenú yā nducuéⁿe, ní deenú yā nducuéⁿe vaadi deenu yeⁿe Ndyuūs. ¹¹¿Du'ú 'iiⁿyāⁿ cuuvi deenú yā chi nadacadiinúⁿ taama 'iiⁿyāⁿ? Dámaaⁿ espíritu yeⁿe maáⁿ yā deēnu chi maáⁿ yā nadacadínnuⁿ yā. 'Tíicā ntūūⁿ mar 'áámá 'iiⁿyāⁿ nguæe cádínnuⁿ yā chi Ndyuūs nadicadínnuⁿ yā, ti dámaaⁿ Espíritu N'dai yeⁿe Dendyuūs deenu

yā yeⁿe Dendyuūs. ¹²S'uūúⁿ ní nguéé sta'ā yú espíritu chi yeⁿe iⁿ'yeeⁿdí ti sta'ā yú Espíritu N'dai chí cuchii yeⁿe Ndyuūs. Maaⁿ ní cuuvi deenu yú nducuéⁿe chí n'daacā n'dai ti Ndyuūs teé yā s'uūúⁿ Espíritu N'dai yeⁿe yā. ¹³Ngaⁿa ntūūⁿ yú yeⁿe nducuéⁿe chuū. Nguéé ngaⁿa yú ndúucū nduudu chi ngi'cueeⁿ 'iiⁿyāⁿ yeⁿe iⁿ'yeeⁿdí 'cūū. Espíritu N'dai yeⁿe Ndyuūs ca'cueeⁿ yā nducyaaca 'iiⁿyāⁿ chi canee ndúucū Espíritu N'dai miiⁿ.

¹⁴'Iiⁿyāⁿ chi nguéé i'téenu yā Jesucristo yeⁿe yú nguéé ituumicádiinnuⁿ yā dendu'ū chí yeⁿe Espíritu N'dai yeⁿe Dendyuūs, ti sta'ā yā nduudu miiⁿ tan'dúucā 'áámá cosa chí duuchi. Ní nguéé cuuvi tuumicadiinúⁿ yā nduudu miiⁿ ti canéé chi cadiinúⁿ yā nduudu miiⁿ cáávā Espíritu N'dai yeⁿe Dendyuūs. ¹⁵'Iiⁿyāⁿ chi canéé ndúucū Espíritu N'dai yeⁿe Dendyuūs n'diichí yā tanducuéⁿe dendu'ū, naati 'iiⁿyāⁿ chi nguéé i'téenu yā Jesucristo nguéé cuuvi tuumicadiinúⁿ yā táacā idiíⁿ 'iiⁿyāⁿ chi canee ndúucū Espíritu N'dai yeⁿe Dendyuūs. ¹⁶Canéé nguūⁿ na libro yeⁿe Ndyuūs ndíí vmnaaⁿ chi ngaⁿa tíicā: 'Iiⁿyāⁿ chi nguéé i'téenu yā Jesucristo, ¿táacā cuuvi deenú yā chi nadacadiinúⁿ 'iivú Ndyuūs? ¿Du'ú 'iiⁿyāⁿ cuuvi ca'cueeⁿ yā Ndyuūs? S'uūúⁿ chí canee yú ndúucū Espíritu N'dai yeⁿe Dendyuūs snee yú ndúucū vaanicadínnuⁿ yeⁿe Cristo chi 'iivú Ndyuūs yeⁿe yú.

S'uūúⁿ ní compañeros yeⁿe yú vi'i ní diiⁿ yú ntiiⁿnyuⁿ yeⁿe Dendyuūs

3 Ndís'tii hermanos yeⁿe, nguéé cuuvi caaⁿmáⁿ ndúucū ndís'tii

tan'dúúcā chi ndís'tií ní 'iiⁿ'yāⁿ
 chi 'áámá canéé ndúúcū Espíritu
 N'dai yeⁿ'é Ndyuūs, ní 'iiⁿ'yāⁿ chí
 n'giindiveéⁿ yā yeⁿ'e yā. Naati
 caⁿ'á nduucú nī tan'dúúcā chi
 ndís'tií daiya yeⁿ'é Ndyuūs ndís'tií,
 tan'dúúcā chi ndís'tií 'iiⁿ'yāⁿ chi
 caama i'téenu yā Cristo ndís'tií.
 2 Tan'dúúcā da'caiyāa chi ngi'i leche
 ti 'āā cuéé cuuvi che'é yā, 'tiicá ntúūⁿ
 ndís'tií. Ca'cueéⁿ ndís'tií ndúúcū
 dendu'ū nduudu chi nguéé ngiⁿ'ií, tí
 nguéé dííⁿ nī tan'dúúcā chi ngaⁿ'a
 Espíritu N'dai yeⁿ'é Ndyuūs. 3 Naati
 tan'dúúcā 'iiⁿ'yāⁿ yeⁿ'é iⁿ'yeeⁿ dí' cūū
 dííⁿ yā chi neⁿ'e maáⁿ yā, 'tíicā idiíⁿ
 nī. Ndís'tií ní 'téé ní nguⁿ'u nī ní
 nguéé nduuvidaamá nī. Nguéé idiíⁿ
 n'daacá nī tan'dúúcā 'iiⁿ'yāⁿ chi
 i'téenu yā 'iivú Ndyuūs chi idiíⁿ yā,
 ti idiíⁿ nī tan'dúúcā 'iiⁿ'yāⁿ chi nguéé
 i'teenú yā 'iivú Ndyuūs chi idiíⁿ yā
 'tíicā, ní idiíⁿ 'tíicā nī. 4 Caati nán'ā
 ndís'tií ngaⁿ'á nī: 'Úú ní i'teenú
 tan'dúúcā chi ngaⁿ'a Pablo, ní táámá
 nī ngaⁿ'a nī: 'Úú i'teenú tan'dúúcā
 chi ngaⁿ'a saⁿ'a Apolos. 5 Áá nguéé
 ngaⁿ'á nī tan'dúúcā chi caⁿ'a nī
 tiempo chi 'āā chó'oo taachi 'āā
 cuéé cu'téenu nī Jesucristo? 5 ¿Du'ú
 saⁿ'a Pablo 'úú? ¿Du'ú saⁿ'a Apolos
 miiⁿ? 6 Áá nguéé nús'ūu 'iiⁿ'yāⁿ chi
 dichíí vē Dendyuūs? Ngaⁿ'á 'nū
 nduudu chi ch'iⁿ'i Dendyuūs nús'uu
 ní ndís'tií ní i'teenú nī. 6 'Úú ngaⁿ'á
 nduudu yeⁿ'é Dendyuūs nanááⁿ
 ndís'tií ní dííⁿ tan'dúúcā chí chiínú
 ndaata na staava yeⁿ'é nī. Sáⁿ'ā
 Apolos miiⁿ canee sa ndúucu nī
 ní ngi'cueeⁿ sá ndís'tií ní diiⁿ sa
 tan'dúúcā chí ch'iiⁿ'yú sa ndaata
 miiⁿ. Dendyuūs dííⁿ yā chi 'cuiita
 ndaata miiⁿ. 7 Cáāvā chuū 'iiⁿ'yāⁿ

chi ngaⁿ'a nduudu yeⁿ'é Dendyuūs
 o 'iiⁿ'yāⁿ chí ca'cueeⁿ nduudu miiⁿ
 nguéé ch'eté yā. Dámaaⁿ Ndyuūs
 chi 'cuiitā yā nduudu miiⁿ ní ch'etete
 cá yā. 8 'Iiⁿ'yāⁿ chi caaⁿ'máⁿ yā
 nduudu miiⁿ ní 'iiⁿ'yāⁿ chi ca'cueeⁿ
 yā nduudu miiⁿ, 'āā daamá nūuⁿ dííⁿ
 yā ntiiⁿ'nyuⁿ yeⁿ'é Ndyuūs. Ndyuūs
 ca'á yā 'iiⁿ'yāⁿ miiⁿ chiiⁿ chi cuuvi
 yeⁿ'é yā caavā ntiiⁿ'nyuⁿ yeⁿ'e yā chí
 dííⁿ yā. 9 Nús'uu ní daama dáámá
 nuúⁿ idiíⁿ 'nū ntiiⁿ'nyúⁿ ndúúcū
 Dendyuūs. Ndís'tií ní tan'dúúcā
 'áámá campo yeⁿ'é Ndyuūs chí
 Ndyuūs chidi'cuiitā yā 'tíicā ndis'tií.
 Tan'dúúcā 'áámá va'ai chí idin'dai
 Dendyuūs, 'tíicā ndís'tií. 10 Ndyuūs
 teé yā 'úú vaadi deenú yeⁿ'é yā ní
 tan'dúúcā 'áámá saⁿ'ā deenu din'dai
 sa cimientto yeⁿ'e va'ai, 'tíicā 'úú. 'Úú
 ngaⁿ'á nduudu cuaacu chí tan'dúúcā
 cimientto miiⁿ chí din'dai sa. Táámá
 'iiⁿ'yāⁿ 'iicandíí yā ndúúcū va'ai miiⁿ.
 Ca'áámá ca'aama 'iiⁿ'yāⁿ chí 'iicandíí
 yā nduúcū canéé chí 'iicandíí yā
 ndúúcū va'āi ndúúcū cuidado.
 11 Mar 'áámá 'iiⁿ'yāⁿ nguéé cuuvi
 cu'neeⁿ yā táámá cimientto chí
 n'daaⁿ yeⁿ'é chí 'úú chí'neéⁿ, ti tuúú
 yeⁿ'é cimientto miiⁿ ní Jesucristo.
 12 'Iiⁿ'yāⁿ s'eeⁿ chí 'iicandíí yā vmnaaⁿ
 cimientto miiⁿ ndúúcū 'dííⁿnguaaⁿ,
 o ndúúcū 'dííⁿnguee, o ndúúcū
 tuúu ndēe cheeⁿ, o ndúúcū yáⁿ'á,
 o ndúúcū yaāta o ndúúcū 'í'voōo
 canéé chí cadiinúúⁿ yā, ti chuū chí
 ngaⁿ'á. 13 Nguuvi chí Jesucristo dííⁿ
 yā juzgar ntiiⁿ'nyuⁿ yeⁿ'é ca'áámá
 ca'áámá 'iiⁿ'yāⁿ, ní 'íicú 'iiⁿ'yāⁿ
 cádíínuuⁿ yā de'ē ntiiⁿ'nyuⁿ chiiⁿ
 yeⁿ'é 'áámá 'áámá yā. Ntiiⁿ'nyuⁿ
 miiⁿ ní canéé chí cho'ōo naavtaⁿ'ā
 ngiichí yaⁿ'ā ní deenú yā 'iiⁿ'yāⁿ

yeⁿe ntiiⁿnyuⁿ yeⁿé yā. ¹⁴Nduuti chí cunee ntiiⁿnyuⁿ yeⁿe 'iiⁿ'yāⁿ s'eeⁿ chí 'licandí yā vmnaaⁿ cimientó miiⁿ, ntiiⁿnyuⁿ chí 'āā chó'oo naavtaⁿā ngiichi yaⁿā ní nguēē chiichi, tuuⁿmi ní 'iiⁿ'yāⁿ s'eeⁿ véé chí cuuvi yeⁿe yā. ¹⁵Ndúúti chí cuucu ntiiⁿnyuⁿ chí 'licandí yā ndúúcu yaⁿā, tuuⁿmi ní di'cuuinú ntiiⁿnyuⁿ miiⁿ. 'Iiⁿ'yāⁿ s'eeⁿ ní nanguáⁿai yā tan'dúúca 'iiⁿ'yāⁿ chí chéenu yā yeⁿe va'ai yeⁿe yā taachi ngiichi va'ai yeⁿé yā.

¹⁶¿Áá nguéé déenu ndís'tii chí i'teenú nī Jesucristo chí cuerpo yeⁿe nī ní yáacū yeⁿe Dendyuūs, ní canéé Espíritu N'dai yeⁿe Ndyuūs ndúúcu ndís'tii? ¹⁷Ndúúti chí 'áámá 'iiⁿ'yāⁿ dituuvi yā yaacū yeⁿé Ndyuūs, Ndyuūs ní di'cuuinú yā 'iiⁿ'yāⁿ miiⁿ. Yáacū yeⁿé Ndyuūs ní dēēē. Ndís'tii ní yaacū yeⁿé Ndyuūs ndís'tii.

¹⁸Mar 'áámá nī ní nguéé nginnche'í maáⁿ nī ndís'tii. Taachi 'aamá ndís'tii nadacadiinuun nī chí nge'e taavi nī yeⁿé vaadi deenu yeⁿe iⁿ'yeeⁿdí 'cūū, tuuⁿmi ní canee cuuⁿmiⁿ chí díⁿ nī tan'duucā 'áámá 'iiⁿ'yāⁿ chí nguéé deenu. Ní cuuvi ndaācā vaadi deenu yeⁿé nī chí yeⁿé Dendyuūs. ¹⁹Vaadi déenu yeⁿé 'iiⁿ'yāⁿ yeⁿe iⁿ'yeeⁿdí 'cūū tan'dúúca 'áámá cosa chí duuchi nanááⁿ Ndyuūs. 'Āā canéé nguūⁿ na libro yeⁿé Ndyuūs ndíⁿ vmnaaⁿ 'tífca: Ndyuūs díⁿ yā chí vaadi deenu yeⁿé 'iiⁿ'yāⁿ yeⁿé iⁿ'yeeⁿdí 'cūū dííⁿ chí 'cuuvi 'iiⁿ'yāⁿ ní 'iiⁿ'yāⁿ miiⁿ canee yā tan'dúúca chí cundaí yā na trampa yeⁿe maáⁿ yā. ²⁰Canéé nguūⁿ ntuuⁿ táámá chí 'tuuca: 'Iivú Ndyuūs déenu yā vaanicadiinuun

yeⁿé 'iiⁿ'yāⁿ chí deenu yeⁿé iⁿ'yeeⁿdí 'cūū. Nguéé dēē vee dichí'vē chí nadacadiinuun 'iiⁿ'yāⁿ s'eeⁿ. ²¹Mar 'áámá 'iiⁿ'yāⁿ nguéé cuuvi caaⁿmaⁿ yā chí dich'etē yā saⁿā iⁿ'yeeⁿdí 'cūū. Tanducuéⁿē denduⁿú ní yeⁿe ndís'tii. ²²Nduuti chí 'úú chí Pablo, o saⁿā Apolos, o saⁿā Pedro, o nduuti chí yeⁿé iⁿ'yeeⁿdí, o yeⁿe vida yeⁿé yú, o yeⁿe vaadi ngii, o yeⁿe cosa chí 'āā vee o yeⁿé denduⁿú chí caama cuchii, tanducuéⁿē chuū ní yeⁿe ndís'tii. ²³Ní ndís'tii ní yeⁿe Cristo ndís'tii. Ní Cristo miiⁿ ní yeⁿe Dendyuūs chí cánduuchi yā cueⁿe daāⁿmaⁿ.

Ntiiⁿnyuⁿ yeⁿe apóstoles

4 Ndís'tii ní didúúché nī nús'uu tan'dúúca 'iiⁿ'yāⁿ chí idiⁿ ntiiⁿnyúⁿ yā yeⁿe Jesucristo. Nús'uu ní ngaⁿá 'nū nduudu cuaacu yeⁿé Ndyuūs nanaaⁿ ndís'tii. Vmnááⁿ vmnaaⁿ ní nguéé chí cadíinuun nī naati maaⁿ ní cádiinuun nī nduudu cuaacu miiⁿ. ²'Iiⁿ'yāⁿ chí díⁿ ntiiⁿnyuⁿ yeⁿe 'iivú Ndyuūs canee cuuⁿmiⁿ chí díⁿ yā cumplir tanducuéⁿē chí caaⁿmaⁿ Ndyuūs yeⁿé ntiiⁿnyuⁿ chí díⁿ yā. ³Nguéé dēē vee tuneē 'úú nduuti chí 'iiⁿ'yāⁿ díⁿ yā juzgar 'úú, o nduuti chí ndís'tii, o táámá 'iiⁿ'yāⁿ o 'úú maáⁿ n'diichí nuuⁿndi yeⁿé. ⁴Áará chí staava yeⁿé ngéé diiⁿ condenar 'úú cáávā chiiⁿ chí díⁿ, 'úú nguéé cuuvi caaⁿmaⁿ chí nguéé nuuⁿndi yeⁿé. Dámaāⁿ Señor Jesucristo díⁿ yā juzgar 'úú, ní caaⁿmaⁿ yā nuuⁿndi yeⁿé. ⁵Ndís'tii nguéé díⁿ nī juzgar 'iiⁿ'yāⁿ. Taachí ndáá Señor Jesucristo yeⁿé yú taama vmnéⁿēē tuuⁿmi 'cuuⁿmfíⁿ yā tanducuéⁿē chí

cadiinu^u yú 'aama 'aama yú ndii na staava yeⁿé yú. Tiempo miⁿ ní 'iivú Ndyuūs téé yā s'uuúⁿ chí cuuvi yeⁿé yú caavā ntiⁿnyuⁿ chí diⁿ yú.

⁶Úú ngaⁿá yeⁿé chí 'úú ndúúcū saⁿā Apolos diⁿ 'nū. Ní 'íicú ndís'tiⁱ cuuvi 'cueéⁿ nī tan'dúúcā chí cuuvi diⁿ nī tan'dúúcā chí canéé ngu^u ndíí vmnaaⁿ na libro yeⁿe Ndyuūs. Ndís'tiⁱ nguéé n'diichí nī 'iⁿyāⁿ. Ní nguéé caaⁿmán nī chí 'áámá 'iⁿyāⁿ chí ch'etee ca yā nguéé ti táamá yā. ⁷¿D'é cuuvi chí ngaⁿa nī chí naⁿa 'iⁿyāⁿ chí ch'etee yā? ¿Áá nguéé tee Ndyuūs tanducuéⁿe chí vee yeⁿé nī? ¿D'e cuuvi chí ngaⁿa nī chí tanducuéⁿe chí vee chí yeⁿé nī ní maáⁿ nī staⁿá nī, ní nguéé diⁿ nī cuenta yeⁿé chíiⁿ chí tee Ndyuūs ndís'tiⁱ?

⁸Ndís'tiⁱ ní nadacadíinu^u nī chí deenú nī nducuéⁿe chí yeⁿe nduudu yeⁿe Dendyuūs. Ní diⁿ nī tan'dúúcā 'iⁿyāⁿ chí 'cuica. Taachi nguéé ch'etineeⁿ 'nū ndúúcū ndís'tiⁱ, tuu'mi ní ndís'tiⁱ diⁿ nī tan'dúúcā chí reyes ndís'tiⁱ. Nduuti chí ndaa tiempo chí ndís'tiⁱ caaⁿmán nī ntiⁿnyuⁿ ti rey ndís'tiⁱ, tuu'mi ní nús'uu caaⁿmaⁿ ntiⁿnyúⁿ 'nū nduucú nī. ⁹Tan'dúúcā chí 'úú nadacadíinu^u, nús'uu chí apóstoles ní candée 'nū nduudu yeⁿe Ndyuūs. Ndyuūs s'neéⁿ yā nus'ūū lugar chí ndii na n'giinū yeⁿe fila. Ní nús'uu canéé 'nū tan'dúúcā 'iⁿyāⁿ chí nīiⁿnuúⁿ cánee nguuvi chí 'cuūvi yā, ní nīiⁿnuúⁿ canéé nguuvi chí ch'iⁿnuúⁿ yā nús'uu. 'Tíicā snéé nús'uu. 'Iⁿyāⁿ yeⁿe iⁿyeedíⁿ 'cūū ndúúcū ángeles yeⁿé nanguuvi n'gíinu yā nús'uu. ¹⁰'Iⁿyāⁿ yeⁿe iⁿyeedíⁿ 'cūū ngaⁿá yā chí nús'uu tonto 'nū ti neⁿé 'nū

Cristo, naati ngaⁿá yā ti ndís'tiⁱ ní saⁿā deenu ndís'tiⁱ. Ngaⁿá yā ti nús'uu ní 'vaⁿá 'nū naati ndís'tiⁱ ní ditiinú nī. Ngaⁿá yā chí nús'uu ní nguéé n'dáaca 'nū naati ndís'tiⁱ ní n'dáaca nī. ¹¹Ndii nguuvi miⁿ ní cuicu 'nū ní yaaca 'nū va. Ní 'āā ntéé n'dee catécai 'nū chí n'daacā. Ní 'iiche yeⁿé 'nū. Ní 'iⁿyāⁿ ch'eⁿé yā nús'uu. Ní diⁿ yā chí ch'éénú 'nū ndii mífⁿ ní ndii 'múúⁿ ní nguéé vaacu 'nū. ¹²Ní diⁿ 'nū ntiⁿnyuⁿ ndúúcū taⁿá 'nū chí cuuvi cheⁿé 'nū. Taachi 'caa'va yā yeⁿé 'nū tuu'mi ní 'iⁿyāⁿ miⁿ di'viicú yā nús'uu. Diⁿ yā chí nééné ch'eenu 'nū chíi ní nús'uu ní chí cheé 'nū yeⁿé nducuéⁿe. ¹³Caⁿa yā cunncaā yeⁿé 'nū ní chée 'nū ndúúcū vaadi ngiinu. Ndii nguuvi miⁿ 'iⁿyāⁿ nacadiinuúⁿ yā chí nús'uu tan'dúúcā dēcúú yeⁿe iⁿyeedíⁿ 'cūū 'tíica nús'uu.

¹⁴Úú nguéé idinguúⁿ yeⁿe dendu'ú 'cūū yeⁿe ndís'tiⁱ caati chí cuuvi 'cuinaáⁿ nī. Yaa'ví ndís'tiⁱ yeⁿe nducuéⁿe chuū tí ndís'tiⁱ tan'dúúcā daiyá chí nééné neⁿé, 'tíicā ndís'tiⁱ. ¹⁵Áará chí vée ndiichi mil maestros chí ngi'cueéⁿ yā ndís'tiⁱ yeⁿe Cristo, nguéé nééné 'yaaⁿ 'iⁿyāⁿ chí snéé yā tan'dúúcā chiidá nī. 'Úú ní tan'dúúcā chiidá nī na ndaata yeⁿé Dendyuūs, ti candéé evangelio chí nduudu cuaacu chí ngai yeⁿé Cristo nanááⁿ ndís'tiⁱ. Ní ndís'tiⁱ ní chí'téenu nī ní ch'iindiyááⁿ ntúuⁿ nī na ndaata yeⁿé Ndyuūs. ¹⁶Cáávā chíiⁿ 'úú idi'cuítú ndís'tiⁱ. Diⁿ nī tan'dúúcā chí 'úú idiⁿ.

¹⁷Cáávā chuū dicho'ó Timoteo nanááⁿ ndís'tiⁱ. Saⁿā miiⁿ tan'dúúcā daiyá, 'tíica sa. Ní saⁿa chí neⁿé. Saⁿā miiⁿ ní 'áámá canee sa ndúúcū

'iivú Ndyuūs. Saⁿā miiⁿ ní ca'cueeⁿ sa ndís'tiī yeⁿe Cristo. Ní n'gaacu nī yeⁿē tanducueⁿē chi cuuvi dííⁿ nī maaⁿ chi i'teenú nī Cristo tan'dúúcā chi 'úú ngi'cueéⁿ nduu cuaaⁿ nducueⁿē yáacū va. ¹⁸Maaⁿ ní deenú chi náⁿā ndís'tiī ngaⁿ'a nī chi n'geete ndai maaⁿ nī. Ní nadacádíínuuⁿ nī chí 'úú ní 'aa ntéé ndaá naachi cánéé nī. ¹⁹Ndaa nuúⁿ yeⁿē ndís'tiī nduuti chí Ndyuūs neⁿé yā chi ndaá. Taachi ndaá tuuⁿmi 'úú cadiinúúⁿ yeⁿe chi 'iiⁿ'yāⁿ chi ngaⁿ'a maáⁿ yā chi n'geete yā. Cadiinúúⁿ nduuti chí 'iiⁿ'yāⁿ miiⁿ dííⁿ yā tan'dúúcā chi Ndyuūs neⁿé yā chí dííⁿ yā. ²⁰Nducueⁿē yeⁿe naachi Ndyuūs ngaⁿ'a ntiíⁿnyuⁿ yā nguée dámaāⁿ yeⁿe chi ngaⁿ'a yā, ti chiíⁿ chí diíⁿ yā ti poder yeⁿé Ndyuūs. ²¹Deⁿē neⁿé ndís'tiī. ¿Áá neⁿe nī chi taachi ndaá ní dííⁿ regañar ndís'tiī, o taachi ndaá caaⁿ'máⁿ nduucú ndis'tiī ndúúcū vaadī néⁿé?

Ngaⁿ'a yā nuuⁿndi yeⁿē 'áámá saⁿ'a chi caⁿ'á yā na yaācū

5 N'giindiveéⁿ 'nū chi nguááⁿ ndis'tiī véé 'áámá saⁿ'a chí diíⁿ nuuⁿndi ca tí canee sa ndúúcū n'daataá chi nguée yeⁿē sa. Nguée 'tíicā nguaaⁿ 'iiⁿ'yāⁿ gentiles chi nguēe i'téenu yā Jesucristo. N'giindiveéⁿ 'nū chi saⁿ'ā miiⁿ sta'a n'daataá yeⁿē chiida sa ní canee sá ndúúcū tá. ²Ní ndís'tiī ngaⁿ'a maáⁿ nī yeⁿe nī chi n'geete nī n'dáará chí idiíⁿ saⁿ'ā miiⁿ nuuⁿndi 'tíicā. ¿Deⁿē cuuvi chí nguée divíⁿ ní saⁿ'a miiⁿ na yaacū yeⁿé Ndyuūs yeⁿē yú? ³N'dáará chí 'úú nguée canee ndúúcū ndís'tiī inacádiinúúⁿ yeⁿé ndís'tiī. 'Úú ní caaⁿ'máⁿ nuuⁿndi

yeⁿe saⁿ'ā miiⁿ yeⁿe dendú'u chí idiíⁿ sa tan'dúúcā chí 'úú canee ndúúcū ndís'tiī. ⁴Taachí nduuvíidáámá ndís'tiī ná chí duuchi Señor Jesucristo tuuⁿmi ní poder yeⁿē Señor Jesucristo canee ndúúcū ndís'tiī. Ní dííⁿ nī tan'dúúcā chí 'úú canee ndúúcū ndis'tiī. ⁵'Tíicā nadacádiinúúⁿ chí ndís'tiī canee cuuⁿmiⁿ chí dííⁿ nī. Divíⁿ nī saⁿ'ā miiⁿ nguaaⁿ ndís'tiī ti saⁿ'ā miiⁿ ní canee sa yeⁿē na poder yeⁿe yááⁿ'nguiinúuⁿ. 'Tíicā castigo yeⁿē sa. Ní cuuvi cadíínuuⁿ sa yeⁿe alma yeⁿe sa. Ní cuuvi nanguaⁿ'ai alma yeⁿē sa nguuvi chí ndaa ntúúⁿ Señor Jesucristo yeⁿē yú.

⁶Nguée n'dáacā ndís'tiī ní ngaⁿ'á nī chí n'dái ndís'tiī, ní véé 'iiⁿ'yāⁿ chí idiíⁿ yā nuuⁿndi nguaaⁿ ndís'tiī. ¿Áá nguée deenú nī ti ta 'lílíⁿ chuundi levadura ichée ndúúcū tanducueⁿē yaāchí? ⁷Saⁿ'ā miiⁿ tan'dúúcā levadura 'tíicā sa. Ndís'tiī divíⁿ nī saⁿ'ā miiⁿ ní cūnee n'dáaca nī. Cuneé nī tan'dúúcā yaāchí chí nguée levadura yeⁿē, tan'dúúcā pan chí che'e yā yeⁿē pascua. 'Iiⁿ'yāⁿ ch'iíⁿ'núⁿ yā Cristo. Ní Cristo miiⁿ ní tan'dúúcā 'iiti cuūchí chí ch'iíⁿ'núⁿ yā cáávā 'viicu pascua. Cáávā s'uūuⁿ ní Cristo miiⁿ ní sta'á yā lugar yeⁿē 'iiti cuūchí yeⁿe 'viicu pascua ti ch'ii yā cucáávā s'uúúⁿ. ⁸Maaⁿ ní nguée dich'ete yú 'viicu yeⁿe pascua miiⁿ tan'dúúcā 'iiⁿ'yāⁿ chí véé nuuⁿndi yeⁿé yā ti nguée yeⁿe Cristo 'iiⁿ'yāⁿ s'eeⁿ. Ní nguée dich'ete yú ndúúcū vaadī n'giinu na staava yeⁿē yú o ndúúcū cosa chí nguée n'daacā, ti chuū ní tan'dúúcā levadura 'tíicā. Dich'ete yú pascua miiⁿ dámaāⁿ ndúúcū nducueⁿē chí n'daacā na

staava yeⁿē yú ti tan'dúucā pan chi nguée levadura yeⁿē, 'tíicā canee yú.

⁹Áá dinguúⁿ yeⁿe ndís'tií chi nguée cáⁿa nī ndúucū saⁿā chi canee sa ndúucū n'daataá chi nguē yeⁿē sa ndíi nguée cáⁿa nī ndúucū n'daataá miⁿ.

¹⁰Úú nguée ngaⁿá chi nguée n'diichí nī sáⁿā chi véé n'daataá yeⁿē sa, o n'daataá chi véé saⁿā yeⁿē tá, o 'iⁿ'yāⁿ chi nginnche'í yā 'iⁿ'yāⁿ, o 'iⁿ'yāⁿ chi duūcú, o 'iⁿ'yāⁿ chi i'teenú yā ídolos. Ndís'tií nguée cuuvi cuneé nī na iⁿ'yeeⁿdí cūū ní nguée n'diichí nī 'iⁿ'yāⁿ yeⁿe iⁿ'yeeⁿdí cūū. ¹¹Naati maaⁿ ní 'āā dinguúⁿ yeⁿē ndís'tií chi nguée cáⁿa nī ndúucū 'iⁿ'yāⁿ s'eeⁿ chi ngaⁿá yā chi hermanos yeⁿē nī ní nguée n'daacā idiíⁿ yā, ti saⁿā chi canee ndúucū n'daataá chi nguē yeⁿe sa, o n'daataa chi canee ndúucū saⁿa chi nguē yeⁿē tá. Ndíi nguée cáⁿa nī ndúucū 'iⁿ'yāⁿ chi i'teenú yā ídolos. Ndíi nguée cáⁿa nī ndúucū 'iⁿ'yāⁿ chi ngaⁿá yā nduudu yaadi, o ndúucū 'iⁿ'yāⁿ chi nginnche'í yā 'iⁿ'yāⁿ, o ndúucū 'iⁿ'yāⁿ chi ngii cuuⁿ'vi, o ndúucū 'iⁿ'yāⁿ chi duucu. Ní nguée cheⁿē nī ndúucū 'iⁿ'yāⁿ s'eeⁿ. ¹²¿De'ē cúúví chí 'úú n'diichí nuuⁿndi yeⁿe 'iⁿ'yāⁿ chi nguée i'téenu yā Jesucristo yeⁿē yú? Chuū ní nguée n'tiíⁿnyuⁿ yeⁿē ti yeⁿē Dendyuūs. Ndís'tií canee chi n'diichi nī nuuⁿndi yeⁿe 'iⁿ'yāⁿ chi caⁿá yā yaacū ndúucū nī. ¹³Jesucristo n'diichí yā nuuⁿndi yeⁿe 'iⁿ'yāⁿ chi nguée i'téenu yā Ndyuūs. Maaⁿ ní ndís'tií diví nī saⁿā miⁿ nguaaⁿ ndís'tií.

**'Iⁿ'yāⁿ chi i'téenu yā Señor
Jesucristo naⁿá yā nanááⁿ juez
ndúucū vaadi 'caaⁿ'va yeⁿē yā**

6 Nduuti chi 'aama chée ndís'tií
véé vaadi 'caaⁿ'va ndúucū

taama chée ndís'tií, ¿de'ē cúúví chí caⁿá nī nanááⁿ juez yeⁿe yaāⁿ vaacū nī, ní nguée caⁿá nī nanááⁿ 'iⁿ'yāⁿ chi chée vmnaaⁿ yeⁿe yāacū yeⁿē nī? ²¿Áá nguée deenu ndís'tií ti s'uuúⁿ chi i'teenú yú Jesucristo ndáá nguuví chi cuuvi n'diichi yú nuuⁿndi yeⁿe 'iⁿ'yāⁿ yeⁿe iⁿ'yeeⁿdí cūū? Nduuti chi ndís'tií caⁿá nī n'diichí nī nuuⁿndi chi idiíⁿ 'iⁿ'yāⁿ yeⁿe iⁿ'yeeⁿdí cūū, ¿áá nguée cuuvi n'diichí nī ta 'lírⁿ nuuⁿndi yeⁿe nī chí nguaaⁿ ndís'tií? ³¿Áá nguée deenu ndís'tií chi s'uuúⁿ caⁿa yú n'diichi yú nuuⁿndi yeⁿe ángeles? Ní nduuti chi cuuvi diíⁿ yú 'tíicā tuuⁿ'mí ní cuuvi n'diichi yú denduⁿ'u nuuⁿndi chi véé yeⁿe yú iⁿ'yeeⁿdí cūū. ⁴Nduuti chi canée chi n'diichí nī denduⁿ'u vaadi 'caaⁿ'va nguaaⁿ ndís'tií, n'daacā chi caⁿá nī nanááⁿ 'iⁿ'yāⁿ yeⁿe yaācū 'aara chi nguée 'iⁿ'yāⁿ chí duuⁿ'vī néⁿe yā viⁿ'i. ⁵Ngaⁿá chuū chi cuuvi 'cuinaáⁿ nī. ¿Áá cadiinuⁿ nī chi nguée véé mar 'áámá 'iⁿ'yāⁿ nguaaⁿ ndís'tií, mar 'áámá 'iⁿ'yāⁿ chi nguée cuuvi n'diichí yā duⁿ'u hermano chi véé nuuⁿndi yeⁿe yā? ⁶Nduuti chi véé 'aama hermano chi deenu ca nguaaⁿ ndís'tií, ¿de'ē cúúví chi ngeⁿ'e hermanos ndúucū vaadi 'caaⁿ'va yeⁿē yā nanááⁿ 'iⁿ'yāⁿ chi nguée i'téenu yā Señor Jesucristo yeⁿē yú?

⁷Cuaacu níⁿ'nyúⁿ nguée ng'iⁿ'i ndís'tií chi yeⁿe Ndyuūs ndís'tií ti véé vaadi 'caaⁿ'va yeⁿe 'áámá nī táámá nī ndúucū viⁿ'i. ¿De'ē cúúví chi nguée ichée nī nguaaⁿ ndís'tií denduⁿ'u chi nguē n'daacā chi hermano diíⁿ yā nduucú nī? N'daacā n'dai chi ichée nī tanducueⁿē ní nguée caⁿá nī

nanááⁿ 'iiⁿyāⁿ cucáávā hermanos chi idíⁿ yā ndúúcu nī. ⁸Ndís'tiī, hermanos, ní nguée n'daacā idíⁿ nī chi nginnche'él nī 'áámá nī ndúúcu taama nī chi hermano yeⁿe nī.

⁹Ndís'tiī nguée 'caandiveeⁿ nī chiīⁿ chi 'iiⁿyāⁿ ngaⁿa yā chi cuaacu ní nguée cuaacu. ¿Áá nguée deenu nī chi 'iiⁿyāⁿ chi nguée idin'daacá yā nguée ndaa yā naachí Ndyuūs ngaⁿa ntiīⁿnyúⁿ yā? Ní nguée 'iiⁿyāⁿ s'eeⁿ ndíí nguée 'iiⁿyāⁿ chi sta'á yā n'daataá yeⁿe taama sa, o isaⁿā yeⁿe taama ta, ní nguée n'daataá chi n'diichi tá saⁿā chi nguée yeⁿe tá, ní nguée saⁿā chi n'diichi sa n'daataá chi nguée yeⁿe sá, ndúúcu 'iiⁿyāⁿ chi i'teenu ídolos chi santos, ndúúcu saⁿā chi iduuchinéⁿ ví'i sa. ¹⁰Tiicá ntúuⁿ 'iiⁿyāⁿ duucu, ndúúcu 'iiⁿyāⁿ chi neⁿe cá yā dendu'u chi véé yeⁿe taama 'iiⁿyāⁿ, ndúúcu 'iiⁿyāⁿ chí ngii cúú'ví, ndúúcu 'iiⁿyāⁿ chi ngaⁿa taán yā yeⁿe taama 'iiⁿyāⁿ, ndúúcu 'iiⁿyāⁿ chí itá'á yā yeⁿe taama yā. Nducuéⁿe 'iiⁿyāⁿ s'eeⁿ nguée cuuvi nndaá yā naachi Ndyuūs ngaⁿa ntiīⁿnyuⁿ yā. ¹¹Tiicá ntúuⁿ diiīⁿ ndís'tiī. Dinuuⁿndí nī tiempo chi 'āá chó'oo naati maaⁿ ní Ndyuūs n'diichí yā ndís'tiī tan'dúúcā chi 'āá ntée vee nuuⁿndi yeⁿe nī cáávā Jesucristo. Maaⁿ ní ndís'tiī ní dííⁿ nī nducuéⁿe chi n'daacā ti yeⁿe Jesucristo ndís'tiī. Ní Espíritu N'dai yeⁿe Ndyuūs yeⁿe yú canée ndúúcu nī.

Yeⁿe chi n'daacā chi diiⁿ yú

¹²Tanducuéⁿe chi nguée nuuⁿndi cuuvi dííⁿ, naati nducueⁿe chi n'daacā nguée neⁿe dííⁿ, ti nguée n'dai chi dííⁿ. Cuuvi dííⁿ tanducuéⁿe

chi neⁿe chi n'daacā, naati nguée necio canee yeⁿe mar 'áámá dendu'ū. ¹³Cuaacu chi yútē chi che'e yú ní caavā cheeti yú. Cheeti yú ní neⁿe che'e yuūtē. Naati Ndyuūs dí'culiín yā yuūtē chi che'e yú ndúúcu cuerpo yeⁿe yú ndúúcu chi véé yeⁿe. Nguée cuuvi caaⁿmaⁿ yú chi Ndyuūs teé yā cuerpo yeⁿe yú chi n'daataá n'diichí yā saⁿā. Ndyuūs dííⁿ yā chi s'uuúⁿ chi cuuvi yeⁿe yā ní cuerpo yeⁿe yú ní yeⁿe Dendyuūs. ¹⁴Jesucristo chi 'iivi yú, Ndyuūs nducueeⁿ yā yeⁿe nguaaⁿ tináⁿā. 'Tiicá ntúuⁿ Ndyuūs nadacueeⁿ ntúuⁿ yā s'uuúⁿ ndúúcu poder yeⁿe yā.

¹⁵¿Áá nguée deenu ndís'tiī chi cuerpo yeⁿe nī ní yeⁿe Cristo? ¿Áá cuta'á nī 'áámá saⁿā chi yeⁿe Cristo ní dííⁿ nī chi saⁿā miiⁿ yeⁿe 'áámá n'dáátāa chi 'yaaⁿ saⁿā yeⁿe tá? Ndyuūs nguée 'cuáaⁿ yā chi 'tíicā. ¹⁶¿Áá nguée deenu ndís'tiī chi saⁿā chi caⁿa sa ndúúcu n'daātāa chí 'yaaⁿ saⁿā yeⁿe tá nduuvi 'aama nú yā? 'Iivú Ndyuūs ngaⁿa yā ndii cuááⁿ vmnaaⁿ naachi canée nguūⁿ na libro yeⁿe yā 'tiicā: Naachí na'uuví yā ní nduuvi 'aama cuerpo núu yā. ¹⁷S'uuúⁿ chi i'teenu yú Jesucristo chí 'iivi yú canee yú ndúúcu dáámá espíritu chí yeⁿe Jesucristo.

¹⁸Ndís'tiī n'daataá, nguée caⁿā nī ndúúcu saⁿā, o saⁿā nguée caⁿā nī ndúúcu n'daataá, chi idinuuⁿndí nī ti idiiⁿ nuuⁿndí nī ndúúcu cuerpo yeⁿe maáⁿ nī. Castigo yeⁿe nuuⁿndi miiⁿ 'áámá cūnee na cuerpo yeⁿe nī. Tanáⁿa ca nuuⁿndi chi idííⁿ nī ní nguée contra cuerpo chi yeⁿe maáⁿ nī. ¹⁹¿Áá nguée deenú ndís'tiī

chi cuerpo yeⁿé nī chíⁿ chí yaācū
 yeⁿe Espíritu N'dai yeⁿé Ndyuūs
 chi canéé ndúúcū ndís'ti? Ndyuūs
 tee yā Espíritu N'dai yeⁿe yā
 ndís'ti. Maaⁿ ni cuerpo yeⁿe nī
 nguéeⁿ yeⁿe maaⁿ nī ti yeⁿe Espíritu
 N'dai chi yeⁿe Ndyuūs. Ní Ndyuūs
 tee yā ndís'ti Espíritu N'dai yeⁿé
 yā. ²⁰Chuū ní cáāvā Jesucristo cái
 yā ndís'ti ndúúcū 'áámá precio chi
 nééné yaⁿai chíi'vē. Cáāvā chuū
 dich'etē nī Dendyuūs ndúúcū
 nuuⁿmāⁿ cuerpo yeⁿe nī ti ndís'ti
 ní yeⁿé Ndyuūs ndís'ti.

**Pablo ca'á yā consejo 'iiⁿyāⁿ
 chí n'giindivaacu yā**

7 Maaⁿ ní idinguúⁿ ní
 nan'guēcútāⁿa yeⁿe
 preguntas chi dingúⁿ nī yeⁿé.
 N'daacā chi 'aama saⁿā nguéeⁿ
 'caandavaacu sa. ²Naati 'tíicā.
 Deenú chi saⁿā neⁿe sa cūnee
 sa ndúúcū n'daataá. Cáāvā chuū
 n'dáaca chi 'caandavaacu sá ní véé
 n'daataá yeⁿē sa. 'Tiicá ntúūⁿ chi
 'aama n'daataá 'caandavaacu tá ní
 véé saⁿā yeⁿē tá. 'Tíicā ní nguéeⁿ
 dííⁿ yā nuuⁿndi. ³Saⁿā ní canéé chí
 cun'diití sá ndúúcū n'daataá yeⁿē
 sa. 'Tiicá ntúūⁿ n'daata miiⁿ canéé
 chí cun'diití tá ndúúcū sáⁿā yeⁿē
 tá. ⁴N'daataá chi n'gíindivaacu
 tá, cuerpo yeⁿē tá nguéeⁿ yeⁿē
 tá dámaāⁿ tá ti yeⁿe sa ndúúcū
 tá. 'Tiicá ntúūⁿ saⁿā miiⁿ. Cuerpo
 yeⁿē sa nguéeⁿ yeⁿē sa dámaāⁿ sa ti
 yeⁿē sa ndúúcū tá. ⁵Dííⁿ nī cumplir
 ndúúcū n'daata yeⁿe nī o isaⁿā
 yeⁿé nī. Nduuti chi nduu 'uuví nī
 canee yiinú nī yeⁿē 'áámá tiempo
 chi 'áámá caaⁿmaⁿngua'á nī ní ndeé
 nī ndúúcū 'iivú Ndyuūs, tuuⁿmí

chuū ní chi dííⁿ nī cumplir tiempo
 'cūū. 'Cuiinū caaⁿmaⁿngua'á nī
 ndúúcū 'iivú Ndyuūs, tuuⁿmi ní dííⁿ
 nī cumplir ndúúcū isaⁿā o n'daataá
 yeⁿe nī. Nduuti chi nguéeⁿ dííⁿ nī
 'tuucā, tuuⁿmi ní cuuvi neⁿé nī caⁿā
 nī ndúúcū táámá saⁿā o n'daataá.
 Ní yááⁿn'guiinūⁿ n'diichínēⁿ sa
 ndís'ti neⁿe chi nguéeⁿ dííⁿ nī
 cumplir ndúúcū isáⁿā o n'daataá
 yeⁿe nī. Ní cuuvi dííⁿ nī nuuⁿndi.

⁶Úú nguéeⁿ caaⁿmāⁿ ndis'ti
 chíiⁿ chi dííⁿ nī, ndís'ti chí neⁿé
 nī 'caandavaacú nī. Nguéeⁿ teé chuū
 tan'dúúcā 'áámá ley. ⁷Ti neⁿé chi
 nducyaaca saⁿā nguéeⁿ 'caandavaacu
 sa ní cūnee sa dámaāⁿ sa tan'dúúcā
 chí 'úú caneé, naati nguēe cuuví chí
 'tíicā. 'Úú deenu chí Ndyuūs ca'á yā
 'áámá 'áámá 'iiⁿyāⁿ chíiⁿ chí cuuvi
 dííⁿ yā.

⁸Úú ngaⁿā ngii saⁿā n'gaiyáa o
 n'daataá n'gaiyáa ndúúcū n'daataá
 n'guá'aa chí n'daacā chí 'iiⁿyāⁿ s'eeⁿ
 nguéeⁿ 'caandavaacú yā ní cunee
 yā dámaāⁿ yā tan'dúúcā chí 'úú
 caneé. ⁹Nduuti chí nguéeⁿ cuuvi
 'cuēetinēe yā damaāⁿ yā, tuuⁿmi
 ní 'caandavaacú yā. Ti n'daacā chí
 'caandavaacú yā ní nguéeⁿ cūnee
 yā ndúúcū deseo chí saⁿā neⁿe sa
 n'daataá o n'daataá neⁿe tá saⁿā.

¹⁰Chuū ngaⁿā yeⁿé 'iiⁿyāⁿ chí
 n'giindivaacu yā. Saⁿā miiⁿ nguéeⁿ
 divíi sa n'daataá yeⁿē sa, o táⁿā miiⁿ
 nguéeⁿ divii tá isáⁿā yeⁿē tá. Chuū chí
 ley yeⁿe Ndyuūs. ¹¹Ndúúti chí 'áámá
 n'daataá divíi tá yeⁿe isaⁿā yeⁿē ta
 caati nguéeⁿ yaaⁿ yiinú tá ndúúcū isaⁿā
 yeⁿē tá, tuuⁿmi ní 'āā ntéé 'caandavaacu
 tá ndúúcū taama sáⁿā. 'Tiicá ntúūⁿ
 saⁿa yeⁿē tá nguéeⁿ cu'neeⁿ sá n'daataá
 yeⁿē sa cucáāvā taama n'daataá.

¹²Maaⁿ ní chuū chí ngaⁿá ngīi tanáⁿā 'iiⁿyāⁿ ni cosa tan'dúúca chi deenú chi n'daacā cáava yā. Ní chuū ní nguée ley yeⁿe Ndyuūs. Nduuti chi 'áámá saⁿā chi i'teenu Ndyuūs ní n'daataá yeⁿē sa ní nguée i'teenu tá, tuu'mi nguée cu'neeⁿ sa n'daataá yeⁿē sa nduuti chi táⁿā miiⁿ n'daacā canee tá ndúúcū sa. ¹³Tiicá ntúūⁿ, n'daataá chi i'teenu tá ní saⁿā yeⁿe tá nguée i'téenu sa ni n'dáaca canee tá ndúúcū sa, tuu'mi nguée cu'neeⁿ tá isaⁿā yeⁿē tá. ¹⁴Sáⁿā yeⁿē tá chi nguée i'téenu sa ní cuuvi yeⁿē Jesucristo saⁿā miiⁿ cucáávā n'daataá yeⁿē sa chi i'teenu tá. 'Tiicá ntúūⁿ, n'daataá chi nguée i'teenu tá ní cuuvi yeⁿē Jesucristo n'daataá miiⁿ cucáávā isaⁿā yeⁿē tá chi i'teenu sa. Ndúúti chi nguée 'tíicā, tuu'mi ní nguée cuuví yeⁿe Jesucristo daiyá yā. Naati 'tíicā, tuu'mi ní cuuví yeⁿe Jesucristo daiyá yā. ¹⁵Naati nduuti chi saⁿā o n'daata chi nguée i'téenu yā Señor Jesucristo nguée cūnee n'dáaca saⁿā miiⁿ ndúúcū n'daataá yeⁿē sa, o n'daataá míⁿ ndúúcū isaⁿā yeⁿē tá chi i'téenu yā Señor Jesucristo, tuu'mi ní cuuvi divíi yā yeⁿe víi. 'Iiⁿyāⁿ chi i'téenu yā Jesucristo nguée a fuerza chi cunee yā ndúúcū 'iiⁿyāⁿ chi nguē i'téenu yā Señor Jesucristo. Ndyuūs neⁿē yā chi 'iiⁿyāⁿ chi i'téenu yā Señor Jesucristo cunee n'dáaca yā ndúúcū vaadi 'diiⁿ. ¹⁶Ndís'tii 'iiⁿyāⁿ chi i'téenu nī Señor Jesucristo, 'táácā cuuvi deenú nī nduuti chi cuuvi dingúáⁿai nī isaⁿā yeⁿē nī o n'daataá yeⁿē nī? Nguée cuuvi déenu nī chuū chi 'tíicā.

¹⁷Ndyuūs yeⁿē yú yaa'ví yā s'uuúⁿ chi yeⁿē yā s'uuúⁿ. Ní tee yā 'áámá

'áámá s'uuúⁿ ntiiⁿnyuⁿ s'uuúⁿ chí yeⁿē yā chí ituneeⁿ s'uuúⁿ. Ní 'íicú véé ntiiⁿnyuⁿ yeⁿē Ndyuūs yeⁿē 'áámá 'áámá s'uuúⁿ. Ní canee chi 'cuetinee yú n'daacā tan'dúúcā Ndyuūs neⁿe yā chí diiⁿ yú. 'Tíicā ngaⁿa ntiiⁿnyuⁿ 'úú yeⁿē nducyáácā yáacū. ¹⁸Nduuti chi Ndyuūs yaa'ví yā 'áámá saⁿā yeⁿē ndaata Israel chi cuuvi yeⁿe yā ní 'iiⁿyāⁿ 'āā diiⁿ yā circuncidar cuerpo yeⁿe saⁿā miiⁿ ndii chi 'líiⁿ sa tan'dúúcā chí ngaⁿa ley yeⁿe 'iiⁿyāⁿ ndaata Israel, 'āā canee sa 'tíicā. Ndúúti chi Ndyuūs yaa'ví yā 'áámá saⁿā chí cuuvi yeⁿē yā ní saⁿā miiⁿ nguée yeⁿē ndaata Israel ní nguée diiⁿ yā circuncidar cuerpo yeⁿe saⁿā miiⁿ, 'āā canee sa 'tíicā. ¹⁹Nguée dēē vee nanááⁿ Ndyuūs nduuti chí diiⁿ yā circuncidar cuerpo yeⁿe saⁿā o nguée. Dámaāⁿ dichíí'vē nduuti chí cu'teenu yú Jesucristo ní diiⁿ yú tan'dúúcā chí Ndyuūs neⁿē yā. ²⁰Tan'dúúcā chí ndís'tii 'āā canee nī taachí Ndyuūs yaa'ví yā 'áámá 'áámá ndís'tii 'tiicá ntúūⁿ cunee nī. ²¹Taachi Ndyuūs yaa'ví yā n'dii chí cuuvi yeⁿē yā, nduuti chí n'dii canee nī tan'dúúcā chí canee 'iiⁿyāⁿ chí canee caadi 'iiyu ní nguée cuuvi naⁿa yā nguée nacádiinúúⁿ nī dēē vee yeⁿē chúú. Ní nduuti chí cuuvi canee libre ndís'tii, chí diiⁿ nī ntiiⁿnyuⁿ caadi 'iiyu tuu'mi ní caⁿá nī. Ní cunee nī libre. ²²Taachí Ndyuūs yaa'ví yā 'iiⁿyāⁿ chí canee caadi 'iiyu ní 'iiⁿyāⁿ miiⁿ i'téenu yā Jesucristo, 'iiⁿyāⁿ canee yā tan'dúúcā chí libre, ti canee libre yā yeⁿe nuu'ndi yeⁿē yā. 'Iiⁿyāⁿ chí canee libre taachí Ndyuūs yaa'ví yā 'iiⁿyāⁿ, 'iiⁿyāⁿ miiⁿ nguée libre

ti dichí'v'e yā Ndyuūs. ²³I'ivú Ndyuūs ní cá yā ndís'tiī ndúúcū 'áámá precio chi néené ya"ai chii'v'e ti yuúú" ye"e daiyá yā. Maa" ní ndís'tiī ní ye"é Ndyuūs ndís'tiī. Ní díi" nī ntii"nyu" ye"é Ndyuūs. Nguéé díi" nī tan'dúúcā 'i'i"yā" ye"e i"yee"dí 'cūū chi nguεε i'téenu yā Jesucristo nga"a yā chí díi" nī. ²⁴Ndís'tiī hermanos ye"é, ca'áámá ca'áámá ndís'tiī canéé nī ndúúcū Ndyuūs. Naachi canéé nī míf" canéé Dendyuūs ndúúcu nī.

²⁵Úú ca'á 'áámá consejo ye"é n'daataá chi nguéé n'giindivaacu tá. Deenú chi nga"á tan'dúúcā chí Dendyuūs né"é yā, naati chuū ní nguéé ley ye"é yā. 'Úú Pablo 'úú chi i'teenú Ndyuūs. Ní Ndyuūs ch'i"í yā 'úú chii" chi 'úú díi" ní nga"á. ²⁶Úú nadacadiinúú" chi n'daaca chi sa"ā s'ee" 'cuεetinée sa damaā" sa. Ti maa" ní deenu yú chi ndaā tiempo chi n'geenu yú ngii. ²⁷Ndís'tiī sa"ā chi véé n'daataá ye"é nī, nguéé cu'nee" nī tá"ā. Ndís'tiī sa"ā chi nguéé n'daataá ye"é nī nguéé in'nuú" nī n'daataá chi cuuvi ye"é nī. ²⁸Nduuti chi 'áámá sa"ā ch'iindivaacu sa, nguéé dinuū"ndí sa. Nduuti chi n'daataá míf" 'caandavaacú tá, nguéé dinuu"ndí tá. 'Úú nadacadiinúú" chi 'i'i"yā" chi ch'iindivaacu yā ní 'cueenu cá yā cuuvi. Nguéé ne"é chi ndís'tiī 'cueenu cá nī cuuvi.

²⁹Chuū nga"á ngii ndís'tiī hermanos ye"é: Nguéé 'naa" tiempo 'cuεetinée yú i"yee"dí 'cūū. Sa"ā chi véé n'daataá ye"é sa ndii" sa ntii"nyu" ye"e 'iivú Ndyuūs vmnáá" vmnaa" nguéé ti ne"e n'daataá ye"é sa. ³⁰Nguéé díi" nī cuenta ye"e de'e

vεε chi chó'oo ye"é nī. Nduuti chi ngeεcú nī ye"e 'aama tiná"ā nguéé 'naa" tiempo cuεcú nī. Nduuti chi yeenú nī ti véé 'áámá 'viicu nguéé 'naa" tiempo cunéé vaadi yeenú nanáa" nī. Nduuti chi ngái nī tuu'mi ní ngáácú nī chi nguéé 'naa tiempo cunee. ³¹Ní ndís'tiī chi véé negocio ye"é nī ye"é cosa chi véé ná i"yee"dí 'cūū, nguéé 'cuεetineé nī dámaā" ye"e chuū, ti i"yee"dí ndúúcū nducué"é chi vεε ye"é nī chó'oo.

³²Úú ne"é chi nguéé nadacadíinuu" nī ye"é dendu'ū chi véé. Sa"ā s'ee" chi nguéé n'giindivaacu sa ndée sa cuidado ye"e dendu'ū chi ye"é 'iivú Ndyuūs. Ní idii" sa tan'dúúcā chi ne"é Ndyuūs. ³³Sa"ā chi n'giindivaacu sa ndée sa cuidado ye"é chi véé na i"yee"dí 'cūū táácā cuuvi cunee yínūu n'daataá ye"é sa. ³⁴'Tiicá ntúū" idii" n'daataá chí n'gíndiváacu tá. 'Áámá n'daataá chí nguéé n'giindivaacu tá ndée tá cuidado ye"e dendu'ū ye"e 'iivú Ndyuūs. Ní díi" tá ndúúcū nuu"ma" staava ye"é tá nducué"é chi ne"e Ndyuūs. Nguéé 'tíicā idii" n'daataa chí n'giindivaacu tá. Ndée tá cuidado ye"e nducué"é ye"é vaacu tá nī táácā chi cuuvi cunee yínūu isa"ā ye"é tá.

³⁵Nga"á ngii ndís'tiī chuū: Nguéé chi nguéé 'caandavaacú nī ti ne"é chi ndís'tiī ní cuuvi cunee n'daaca cá nī. Ne"é chi ndís'tiī díi" nī ndúúcū nuu"ma" staava ye"e nī chii" chi cuuvi dichí'v'e ca Ndyuūs. Ní cu'neé" nī nducué"é chi véé i"yee"dí 'cūū chí cuuvi nī.

³⁶Nduuti chi 'áámá sa"ā nadacadíinuu" sa chi n'daacā

chi daiya sa chi n'daataa cuiinu
'caandavaacu tá ti véé nduuyu ye"ⁿ
tá tuu'mi ní cuuvi dii"ⁿ sa n'daacā
caava tá. Ní 'caandavaacú tá. Chuū
ní nguée nuu"ⁿndi. ³⁷Nduuti chi
táámá sa"ⁿā mii"ⁿ nguée ne"ⁿe sa chi
daiya sa 'caandavaacu tá ti canée
ditiinú sa na staava ye"ⁿe sa chi
nguée ne"ⁿe sa 'caandavaacu tá,
tuu'mi ní cunee libre sa. Ní cuuví
dii"ⁿ sa chee chí ne"ⁿe sa. Ní dii"ⁿ sa
cuidado tá"ⁿā daiya sa. Ní n'daacā
idii"ⁿ sa. ³⁸Sa"ⁿā chi nga"ⁿa sa chi
n'gíindivaacu tá, o sa"ⁿā chi nguée
ne"ⁿe sa chi 'caandavaacú tá, nduu
'uuví sa"ⁿā mii"ⁿ din'daacá sa. Naati
n'daacā ca idii"ⁿ sa"ⁿā chi nguée ne"ⁿe
sa chi 'caandavaacú tá.

³⁹N'daataa chi n'gíidívaacu tá
canée chi 'cuεtinee tá ndúúcū
isa"ⁿā ye"ⁿe tá núú"ⁿmán ne"ⁿe chí
cándúúchi sá. Ndúúti chi 'cuūví
sa"ⁿā ye"ⁿe tá tuu'mi ní cuuví
'caandavaacu tá ndúúcū táámá
sa"ⁿā chi i'téenu sa Jesucristo. ⁴⁰Úú
inadacádiinúú chí n'daacā ca ye"ⁿe
tá chi 'aa ntée 'caandavaacu tá.
Chuū chi nga"ⁿá nguée dámaā"ⁿ ye"ⁿe
chi 'úú nadicádiinúú ti tan'dúúcā
chi ne"ⁿe Espíritu N'dai ye"ⁿe
Ndyuūs.

**Ye"ⁿe yuūtē chi 'ii"ⁿyā cá'a yā
ye"ⁿe nátaí ye"ⁿe ídolos**

8 Maa"ⁿ ní idinguú"ⁿ taama chi
ye"ⁿe yuūtē ye"ⁿe 'iiti chi 'ii"ⁿyā"ⁿ
'caa"ⁿnú"ⁿ yā ní cá'a yā yuūtē mii"ⁿ
ye"ⁿe nátaí cáávā ídolos. Deenu yú
chi nducyaaca yú deenu yú 'tεe
ye"ⁿe chuū. 'Ii"ⁿyā chi nadacadiinúú"ⁿ
yā chi deenú cá yā cuuvi dich'εεté
maá"ⁿ yā 'ii"ⁿyā. 'Ii"ⁿyā chi ne"ⁿé yā
Ndyuūs ní ne"ⁿé yā hermanos, 'ii"ⁿyā

mii"ⁿ né"ⁿé yā chi taná"ⁿā hermanos
chi cuuvi déenu cá yā ye"ⁿe Ndyuūs.
²'Ii"ⁿyā chi nadacádiinúú"ⁿ yā
chi deenu yā nguée tanducué"ⁿe
deenu yā tan'dúúcā chi canée chi
cuuví deenu yā. ³Nduuti chi 'áámá
'ii"ⁿyā diné"ⁿe yā Ndyuūs, tuu'mi
ní Ndyuūs inaa"ⁿ yā 'ii"ⁿyā mii"ⁿ.
⁴Maa"ⁿ ní 'úú ne"ⁿé chi cadiinúú"ⁿ ní
ye"ⁿe yuūtē chi 'ii"ⁿyā cá'a yā ye"ⁿe
nátaí ye"ⁿe ídolos. Deenu yú chí
ídolos nguée cánduuchi. Deenu yú
ti 'áámá n'dyá"ⁿā Ndyuūs chi vεe
yā ní nguée ca táámá yā. ⁵'Ii"ⁿyā
nga"ⁿa yā chi nééné véé cá ídolos
na yā"ⁿā 'cūú níícú nanguuvi váá.
Ní 'ii"ⁿyā nga"ⁿá yā chi cosa s'ee"ⁿ ní
dendyuūs s'ee"ⁿ. ⁶S'uuú"ⁿ deenu yú
chi véé 'áámá nuú"ⁿ Ndyuūs ye"ⁿe
yú. Ndyuūs Chiida yú chi din'dái
yā tanducué"ⁿe dendu'ú. Ní Ndyuūs
dii"ⁿ yā chi cuuvi ye"ⁿe yā s'uuú"ⁿ. Véé
'áámá n'dyá"ⁿa 'iiví Ndyuūs ye"ⁿe yú
chi Jesucristo. Ndyuūs Chiida yú
ndúúcū Jesucristo daiyá yā din'dái
yā tanducue"ⁿe dendu'ú chi véé.
Jesucristo ye"ⁿe yú tee yā vida ye"ⁿe
yú cue"ⁿe daā"ⁿma".

⁷Nguée nducyaaca 'ii"ⁿyā chi
i'téenu yā Jesucristo deenú yā chi
'aama n'dyá"ⁿā Dendyuūs vεe yā. Ndi
maa"ⁿ ní nán'a yā ní i'téenu yā chi
canduuchi ídolos. Taachi 'ii"ⁿyā cá'a
yā yuūtē ye"ⁿe nátaí ye"ⁿe ídolos, ní
i'téenu yā chi ca'a yā yuūtē nátaí ye"ⁿe
dendyuūs s'ee"ⁿ. Ní taachi 'ii"ⁿyā chi
duu'ví deenú yā ye"ⁿe Ndyuūs che'é
yā yuūtē ye"ⁿe nátaí s'ee", 'ii"ⁿyā mii"ⁿ
nadacadínuu"ⁿ yā chi véé nuū"ⁿndi
ye"ⁿe yā. ⁸Ndyuūs nguée dii"ⁿ cuenta
yā ye"ⁿe s'uuú"ⁿ nduuti chi nge'e yú
yuūtē mii"ⁿ o nguée. Nduuti chi nge'e
yú yuūtē mii"ⁿ nguée idii"ⁿ chi n'daacā

ca yú. Nduuti chi nguée che'e yú nguée idiiⁿ chi nguée n'daaca ca yú. ⁹Ndís'tii chi déenu nī chee chi Ndyuūs neⁿé yā chi diiⁿ nī, 'caandiveéⁿ nī. Nguée diiⁿ nī de'e vee chi 'iiⁿyāⁿ chi duuⁿvī déénú yā yeⁿe Jesucristo cuuvi nacádiínúuⁿ yā chi vee nuuⁿndi yeⁿe yā. ¹⁰Úú ngaⁿá ngī ndís'tii chi canee diituu cá nī chi i'téenu cá nī Ndyuūs. Deenú nī chi nguée véé nuuⁿndi yeⁿe nī taachi chi snée na mesa yeⁿe níⁿvēē yeⁿe yaācū yeⁿe ídolos. Naati 'iiⁿyāⁿ chi duuⁿvī déénú yā yeⁿe Jesucristo cuuvi n'diichí yā ndís'tii, tuuⁿmi ní 'iiⁿyāⁿ miiⁿ chi nadacadiínúúⁿ yā chi ndís'tii 'tēe 'tēe i'téenu nī ídolos. 'Iiⁿyāⁿ miiⁿ cuuvi diiⁿ yā tan'dúúcā ndís'tii idiⁿ nī. Caⁿá yā che'é yā yuūtē miiⁿ ní diiⁿ yā sentir chi véé nuuⁿndi yeⁿe yā. ¹¹Áará chi cuuvi che'é nī yuutē 'cūū ní nguée véé nuuⁿndi yeⁿe nī nguée neⁿé nī chi hermanos chi duuⁿvī deenú yā yeⁿe Jesucristo diiⁿ yā 'tíicā, caati nguēcúndií yā ní 'tēe 'tēe i'téenu yā ídolos. Ní 'tíicā idiⁿ hermanos ní Cristo ch'ii yā na cruz ntúūⁿ caavā yā. ¹²Taachí diiⁿ nī 'tuucā 'tíicā idinuuⁿndi nī contra Cristo níicú contra yeⁿe hermano chi duuⁿvī déénú yā yeⁿe Jesucristo. Caati hermanos miiⁿ 'tēe 'tēe i'téenu yā ídolos, ní véé nuuⁿndi yeⁿe yā. ¹³Úú nacádiínúúⁿ yeⁿe chuū 'tíicā. Nduuti chi 'úú che'é yuūtē miiⁿ, ní 'úú diiⁿ chi hermano chi duuⁿvī deenú yā yeⁿe Jesucristo che'é yā ní véé nuuⁿndi yā, tuuⁿmi ní 'āā ntéé che'é yuūtē miiⁿ.

Pablo ca'á yā orden ti 'áamá apóstol yeⁿe Jesucristo

9 ¿Áá nguée 'úú Pablo 'áamá apóstol 'úú ní cuuvi diiⁿ nducueⁿé chi nguée nuuⁿndi? ¿Áá

nguée 'úú nnguaⁿāi 'úú? 'Úú n'diichí Señor Jesucristo yeⁿe yú. 'Úú candéé nduudu cuaacu yeⁿe Ndyuūs. Ní ndís'tii i'téenu nī nduudu miiⁿ caavā ntiⁿnyuⁿ yeⁿe. ²Nduuti chi tanáⁿa yā nguée i'téenu yā chi 'úú apóstol 'úú, ndís'tii i'téenu nī chi cuaacu. Ndís'tii ní tan'dúúcā sello 'tiicá nī, ti i'téenu nī Señor Jesucristo. Ní deenú nī chi 'úú 'aama apóstol yeⁿe Señor Jesucristo. Ndís'tii ní yeⁿe Jesucristo caavā chi 'úú candéé nduudu miiⁿ.

³Iiⁿyāⁿ chi itíinguuneeⁿ yā 'úú yeⁿe chi 'úú chi 'aama apóstol, 'túúcā nan'guēcútaⁿá yeⁿe yā. ⁴Nús'uu chi apóstoles ¿áá nguée tuneéⁿ 'nū chi ch'éé 'nū ní cú'ú 'nū ndúúcū ndís'tii na vaacu ní? ⁵¿Áá nguée tuneéⁿ 'nū chi 'áamá 'áamá 'nū candéé 'nū n'daataá yeⁿe 'nū taachi caⁿ'a 'nū cuaaⁿ cyúúni? 'Túúcā diiⁿ tanáⁿā apóstoles, ndúúcū hermanos chi yeⁿe Jesucristo, ndúúcū hermano Pedro. ⁶Dámaāⁿ 'úú ndúúcū Bernabé diiⁿ 'nū ntiⁿnyuⁿ cáávā chi ch'éé 'nū. ⁷¿Du'ú soldado diiⁿ sa gastar tuumi caavā gastos yeⁿe sa taachi diiⁿ sa ntiⁿnyuⁿ miiⁿ? ¿Du'ú saⁿā ngiichi sa díí'yú uvas ní 'áá nguée cuuvi ch'éé sá yeⁿe? ¿Du'ú 'iiⁿyāⁿ chi diiⁿ cuidado 'áamá taaⁿ 'iiti cuūchí ní 'áá nguée cuuvi cu'ú yā leche yeⁿe 'iiti miiⁿ? ⁸Úú nguée ngaⁿá chuū tan'dúúcā chi ngaⁿa saⁿa chi ca'a orden. Ngaⁿá chuū, ti 'tíicā ngaⁿa ley yeⁿe Moisés miiⁿ. ⁹Canee nguūⁿ na libro yeⁿe Ndyuūs chi ley chi Moisés dingúú yā chi 'tíicā: Nguée cu'nuúⁿ ní yaana duutú ti chi inde'ei nuúⁿ ti nguaaⁿ trigo chi nguée cuuvi che'é ti: ¿Áá ndēe cuidado Ndyuūs dámaāⁿ 'iiti? Nguée 'túúcā. ¹⁰Cáávā

nús'uu, ní cuaacu níⁿnyúⁿ canéé nguúⁿ 'tíicā: 'Iiⁿyāⁿ chí di'cuúndú yā 'iiti ndúúcú 'iiⁿyāⁿ chí yiinenaáⁿ yā 'iiti chí inde'ei nuúⁿ tī nguaaⁿ trigo, 'iiⁿyāⁿ s'eeⁿ ní cunee ngiínú yā cosechā yeⁿe yā. ¹¹Candéé 'nū nduudu yeⁿe Ndyuūs nguaaⁿ ndís'tii taachi 'āā cuéé 'caandiveéⁿ nī nduudu miiⁿ. 'Áá nguéé téé nī nús'uu necesidades yeⁿe 'nū? ¹²Nduuti chí tanáⁿā apóstoles cuuvi cuta'á yā necesidades yeⁿe yā yeⁿe ndís'tii, 'áá nguéé cuuvi cuta'á 'nu necesidades yeⁿe 'nū dendú'ú? Nguéé caaⁿmáⁿ 'nū chí ndís'tii téé nī necesidades yeⁿe 'nū naatí chí chéé 'nū nducuéⁿe dendu'ú, caati 'iiⁿyāⁿ cuuvi cu'téénu yā nduudu yeⁿe 'iivú Ndyuūs. ¹³'Áá nguéé déénú ndís'tii chuú ndii tiempo chí 'aa chó'oo yeⁿe 'iiⁿyāⁿ chí diiⁿ ntiiⁿnyuⁿ yeⁿe yaacū templo? 'Iiⁿyāⁿ miiⁿ che'é yā comida yeⁿe yaacū. 'Tiicā ntúūⁿ, 'iiⁿyāⁿ chí diíⁿ yā ntiiⁿnyuⁿ yeⁿe nátai, 'iiⁿyāⁿ miiⁿ che'é ntúūⁿ yā chí véé nátai chí 'iiⁿyāⁿ ndéé yā ndaa yā nátai. ¹⁴'Tíicā ngaⁿa Señor 'iivú Ndyuūs yeⁿe 'iiⁿyāⁿ chí candéé yā nduudu yeⁿe evangelio chí nduudu ngai yeⁿe Jesucristo. 'Iiⁿyāⁿ miiⁿ 'cuetinée yā ndúúcú 'iiⁿyāⁿ chí i'téénu yā Señor Jesucristo, ní ca'á yā 'iiⁿyāⁿ s'uuⁿ chí che'é yā. ¹⁵'Úú nguéé sta'á túumī yeⁿe nī, ní nguéé che'é de'ē vee, ti téé túumī ndís'tii. Nguéé dingúúⁿ chuú chí 'tíicā diíⁿ nī nduucú. N'dáácā ca yeⁿe chí 'cuúví ní mar 'áamá 'iiⁿyāⁿ nguéé cuuvi caaⁿmaⁿ yā chí 'úú candéé ndúúdu cuaacu yeⁿe Dendyuūs cáávā chí nadí'v'e yā 'úú.

¹⁶Áará chí ngaⁿá evangelio chí ndúúdu ngai yeⁿe Jesucristo 'úú nguéé cuuvi caaⁿmáⁿ chí 'úú chí

ch'et'é. Canéé chí caaⁿmáⁿ yeⁿe evangelio, ti cáávā chuú chíⁿ chí Ndyuūs dichó'ó yā 'úú. Néené 'cuenú cuuvi nduuti chí nguéé caaⁿmáⁿ yeⁿe evangelio. ¹⁷Ndúúti chí caaⁿmáⁿ yeⁿe evangelio ti diíⁿ buscar ntiiⁿnyuⁿ miiⁿ tuu'mi ní Ndyuūs nadí'v'e yā 'úú, naati nguéé 'tíicā. Cáávā chuú canéé chí caaⁿmáⁿ evangelio chí ndúúdu ngai yeⁿe Jesucristo. ¹⁸De'é ndaacā yeⁿe 'úú? Nguéé de'ē vee ndaacā yeⁿe. Cáávā 'úú nadí'v'e yeⁿe chíⁿ chí ngaⁿá ndúúdu ngai. 'Úú caaⁿmáⁿ nduudu ngai yeⁿe Jesucristo ní yeenú taavi 'úú ti nguéé cutaⁿá dendú'ú yeⁿe nī. Nguéé caaⁿmáⁿ chí ndís'tii tee nī 'úú de'ē vee cáávā ntiiⁿnyuⁿ yeⁿe 'aara chí cuaacu chí canéé chí diíⁿ nī.

¹⁹N'daacā caneé 'tíicā. Nguéé du'ú vee cuuvi caaⁿmaⁿ ntiiⁿnyuⁿ yeⁿe, ti 'iiⁿyāⁿ nguéé nadí'v'e yā 'úú. 'Úú dichí'v'e nducyáácā 'iiⁿyāⁿ 'iicu cuuvi cu'téénu yā Jesucristo yeⁿe yú. ²⁰Áará chí maaⁿ nguéé costumbre yeⁿe chí idiíⁿ tan'dúúcā chí ngaⁿa ley yeⁿe Moisés, naati taachi caneé nguaaⁿ 'iiⁿyāⁿ hebreo s'eeⁿ chí diíⁿ yā tan'dúúcā chí ngaⁿa ley yeⁿe Moisés, 'tíicā idiíⁿ dendu'ú. Idiíⁿ 'tiicā ní 'iicu 'iiⁿyāⁿ hebreo s'eeⁿ cuuvi cu'téénu yā Jesucristo. ²¹Taachi 'úú caneé ndúúcú 'iiⁿyāⁿ chí 'āā vi'i cā ley yeⁿe yā nguéé ti ley yeⁿe Moisés miiⁿ, 'úú idiíⁿ tan'dúúcā 'iiⁿyāⁿ s'eeⁿ. Naati nguéé idiíⁿ cosa chí Ndyuūs nguéé neⁿe yā chí 'úú diíⁿ. 'Tíicā idiíⁿ, ní 'ífcú 'iiⁿyāⁿ miiⁿ cuuvi cu'téénu yā Jesucristo. ²²Taachi caneé nguaaⁿ 'iiⁿyāⁿ chí duūvā tuu'mi 'úú idiíⁿ tan'dúúcā 'aama chí

duūvā, ní 'iicu cuuvi cu'téenu yā Jesucristo. Nduu cuaaⁿ naachi caⁿ'á 'úú idiíⁿ nducuéⁿ'ē tan'dúúcā chi idiíⁿ 'iiⁿ'yāⁿ s'uuⁿ. Idiíⁿ 'tíicā ní 'iicu dííⁿ chí nanguáⁿ'ai ná'a yā. ²³'Úú idiíⁿ tanducuéⁿ'ē chuū chi 'úú cuuvi caaⁿ'máⁿ nduudu yeⁿ'e Ndyuūs nanááⁿ 'iiⁿ'yāⁿ. Ní cuuvi cuta'a yú cosa chi n'dai chi Ndyuūs téé yā s'uūúⁿ.

²⁴'Áá nguéeⁿ déenu ndís'tií yeⁿ'e 'iiⁿ'yāⁿ chi ngéenu yā na juego? Nducyaaca yā ngéenu yā na juego naati 'áámá núuⁿ yā chi dííⁿ yā ganar ní ndaaca regalo yeⁿ'e yā. Maaⁿ ní ndís'tií dííⁿ nī tan'duucā 'aama chi ngéenu yā ní dííⁿ nī ganar. 'Tíicā dííⁿ nī chiiⁿ chi Ndyuūs neⁿ'é yā, ní tunée ndís'tií chi cuuvi yeⁿ'é nī chēe chí Ndyuūs téé yā ndís'tií. ²⁵Ca'áámá ca'aama saⁿ'ā chi ngeēnū sa nguéeⁿ cuuvi diiⁿ sa nducuéⁿ'ē chi neⁿ'e sa. Dámaāⁿ idiiⁿ sa cosas chi n'daācā caavā sa cucáavā chi ditiinú sa. 'Tíicā idiiⁿ sa ni cuuví ndaacā sa 'áámá corona yeⁿ'e naāndā chi ngo'o yéⁿ'ē. S'uūúⁿ ní idiiⁿ cá yú tan'dúúcā chí Dendyuūs neⁿ'é yā chi diiⁿ yú, ní ndaaca yú 'áámá corona chi nguéeⁿ tuví yeⁿ'ē chi Dendyuūs téé yā s'uūúⁿ. ²⁶'Úú idiíⁿ ntiíⁿ'nyuⁿ yeⁿ'é Ndyuūs tan'dúúcā 'áámá chi ngeenu na juego ní dííⁿ yā ganar. 'Úú idiíⁿ ntiíⁿ'nyuⁿ díítū tan'dúúcā 'iiⁿ'yāⁿ chi nguⁿ'ú yā ndúúcū taamá yā, nguéeⁿ tan'duucā chi nguⁿ'ú yā ní ngéⁿ'é yā na 'yúúné. ²⁷'Úú idiíⁿ sufrir cáavā ntiíⁿ'nyuⁿ yeⁿ'é Ndyuūs, ní diiⁿ n'dai cá ntiíⁿ'nyuⁿ miiⁿ. 'Tíicā idiíⁿ, ti nguéeⁿ neⁿ'é chi cuayiivi chi caaⁿ'máⁿ nduudu cuaacu miiⁿ, Ndyuūs cuuvi caaⁿ'máⁿ yā yeⁿ'e 'úú chi nguéeⁿ n'daaca dííⁿ ntiíⁿ'nyúⁿ yeⁿ'e yā.

Pablo ca'a yā consejo chi 'iiⁿ'yāⁿ nguéeⁿ canee chi i'teenú yā ídolos

10 Ndís'tií hermanos yeⁿ'é, neⁿ'é chi ndís'tií nan'gáácú nī yeⁿ'e tiempo chi 'āā chó'ōo. 'Iiⁿ'yāⁿ hebreos dííⁿ yā seguir 'áámá meēeⁿ chi ngíicá nanguuvi. Ndyuūs dicholó yā méeeⁿ miiⁿ. Ní nducyaaca 'iiⁿ'yāⁿ n'diichi yā tíí cueⁿ'ē méeeⁿ miiⁿ. Ní ngíicá yā ní choló yā naavtaⁿ'ā yíicú chí nuūⁿnīⁿ'yáⁿ'ā chi nguuvi Roja naachí Ndyuūs dííⁿ yā chí nduūví cuuⁿ'máⁿ 'áámá yáanūu yeⁿ'ē caavá yā. ²Nducyaaca 'iiⁿ'yāⁿ ní cueⁿ'é yā ndúúcū Moisés. Ní meēeⁿ miiⁿ ch'iⁿ'i yúúní 'iiⁿ'yāⁿ s'eeⁿ. Ní choló yā naavtaⁿ'ā nuūⁿnīⁿ'yáⁿ'ā ndúúcū Moisés miiⁿ. Chuū ní tan'dúúcā chi Ndyuūs chēedínūⁿnīⁿ yā 'iiⁿ'yāⁿ s'eeⁿ ndúúcū Moisés miiⁿ. ³Nducyáácá yā che'é yā pan chi Ndyuūs dicholó. Ní pan miiⁿ chí chiicā ndii nanguuvi. ⁴Ndyuūs ca'a yā 'iiⁿ'yāⁿ s'eeⁿ nuūⁿnīⁿ chi can'daā na tuūu, ní nducyáácá yā chi'i yā nuuⁿnīⁿ miiⁿ. Ní tuūu miiⁿ ní tan'dúúcā chi Cristo miiⁿ, 'tíicā. Espíritu yeⁿ'é Cristo cueⁿ'ē ndúúcū yā naachí cueⁿ'e yā. ⁵Ndyuūs nguéeⁿ canee yiinú yā tan'dúúcā chi idiiⁿ n'deēe n'daí 'iiⁿ'yāⁿ ti nguéeⁿ ch'iindiveeⁿ yā yeⁿ'é Ndyuūs. Ní 'iiⁿ'yāⁿ s'eeⁿ ch'i yā cuaaⁿ naachi nguéeⁿ 'iiⁿ'yāⁿ na yáⁿ'āa cuūⁿ'máⁿ. ⁶Dendúⁿ chuū chi chó'ōo ní 'íicú n'diichi yú, 'íicú s'uūúⁿ nguéeⁿ neⁿ'e yú yeⁿ'e dendúⁿ chi nguéeⁿ n'daaca tan'dúúcā 'iiⁿ'yāⁿ s'eeⁿ chí idinéⁿ'e yā. ⁷Cáavā chuū nguéeⁿ idiiⁿ yú 'viicu cáavā ídolos, tan'dúúcā chi idiiⁿ tanáⁿ'ā 'iiⁿ'yāⁿ tiempo chi 'āā chó'ōo. Canée nguūⁿ ndii cuááⁿ

vmnaaⁿ na libro yeⁿé Ndyuūs 'tíicā:
'Iiⁿyāⁿ s'eeⁿ díiⁿ yā 'viicu cáávā
ídolos, ní ch'eté yā, ní che'e yā, ní
ch'ií yā ní ch'iinu chuū, ní nacueeⁿ
yā, ní nde'ei yā. Cuayiivi ní saⁿa
s'eeⁿ n'diichí yā n'daataa s'eeⁿ ní
dinuuⁿndí yā. ⁸Nguéé n'diichi yú
'áamá sáⁿā o 'aama n'daataá taachí
'āa cuéé 'caandavaacu yú ndúúcu
yā, tan'dúúcā chi idiíiⁿ tanáⁿā 'iiⁿyāⁿ
s'eeⁿ. Ní cáávā nuuⁿndi yeⁿé yā, na
'áamá nguuví nūuⁿ n'diicu 'íinú mil
'iiⁿyāⁿ ch'ií yā ná yáⁿāa cuūⁿmáⁿ
naachi nguéé 'iiⁿyāⁿ. ⁹Nguéé diiⁿ
yú chí tuuⁿví yú Ndyuūs, ti neⁿe
yú n'diichí yú nduuti chi Ndyuūs
díiⁿ yā castigar s'uūúⁿ tan'dúúcā
chi Ndyuūs díiⁿ yā ndúúcu tanáⁿā
'iiⁿyāⁿ. Ní Ndyuūs dich'óo yā cúu
taaⁿ chí che'é ti 'iiⁿyāⁿ s'eeⁿ ní ch'ií
yā. ¹⁰Ní nguéé caaⁿmaⁿ taaⁿ yú
yeⁿe Ndyuūs tan'dúúcā chi diiⁿ
tanáⁿā 'iiⁿyāⁿ s'eeⁿ. Cáávā chuū ní
Ndyuūs dich'óo yā ángel yeⁿé yā ní
ch'ií yā.

¹¹Tiempo chí 'āa chó'oo ndíi
cuááⁿ vmnaaⁿ, chó'oo tanducuéⁿe
chuū ní canéé nguūⁿ na libro yeⁿé
Ndyuūs. Maaⁿ ní s'uūúⁿ cuuvi deenu
yú yeⁿe 'iiⁿyāⁿ s'eeⁿ ní nguéé diiⁿ
yú tan'dúúcā chí díiⁿ yā. ¹²Cáávā
chuū 'iiⁿyāⁿ chi nadacadiinúúⁿ yā
chi i'teenu diitú yā Ndyuūs canee
chi nadacadiinúúⁿ yā chee chi díiⁿ
yā, ní nguéé 'cuūvá yā na nuuⁿndi.
¹³Ndís'tií 'caandiveéⁿ nī yeⁿé.
Mar 'áamá cosa chi nguéé n'daacā
nguéé ndaā nanááⁿ ndís'tií nduuti
chi nguéé ndaā nanááⁿ tanáⁿa
ca 'iiⁿyāⁿ. Ndyuūs ní n'dai ca yā
ndúúcu ndís'tií, ní nguéé 'cuúⁿ yā
chi ndaā nanááⁿ ndís'tií dendu'ū chi
nguée cuuví cuchée nī. Taachi ndaā

dendu'ū chi nguéé n'daacā nanaaⁿ
ndís'tií Ndyuūs teé yā fuerzas
ndís'tií chi nguéé díiⁿ nī dendu'ū chi
nguéé n'daacā. Ní 'íicú cuuví cuchée
nī.

¹⁴Cáávā chuū ndís'tií hermanos
chi neⁿé taavi, divíi nī yeⁿe
nducyaaca ídolos. ¹⁵Úú ngaⁿá
ngii ndís'tií chi 'iiⁿyāⁿ chi deenu,
ní ndís'tií cuuvi deenú nī yeⁿe
chíiⁿ chí ngaⁿá nduuti chi nduudu
cuaacu o nguéé. ¹⁶Taachi diiⁿ yú
'viicu ní che'e yú Santa Cena yeⁿe
Señor Jesucristo ní sta'a yú taza
chi cu'u yú vino, tuuⁿmi ní caaⁿmaⁿ
yú gracias Ndyuūs chi di'viicú yā
vino miiⁿ. Diiⁿ yú chuū ti maaⁿ ní
ch'i'i yú chi yeⁿé Cristo s'uūúⁿ. Ní
véé vida yeⁿe yú cueⁿe daāⁿmaⁿ
cucáávā yuūúⁿ yeⁿé Cristo chí
n'geeⁿ. Pan yeⁿe Santa Cena chi
n'dee yú, n'dee yú ti maaⁿ ní yeⁿé
Cristo s'uūúⁿ. Ní cuerpo yeⁿe yā
ca'nééⁿngá'āa na cruz cáávā s'uūúⁿ.
¹⁷S'uūúⁿ ní 'yaaⁿ yú ní nducyaacu
yú che'e yú yeⁿe 'áamá pan nūuⁿ.
'Tíicā s'uūúⁿ ní tan'dúúcā 'áamá
cuerpo nūuⁿ ti yeⁿé Cristo s'uūúⁿ.

¹⁸Cuin'diichí nī 'iiⁿyāⁿ yeⁿe
ndaata Israel tiempo chi 'āa chó'oo.
'Iiⁿyāⁿ s'eeⁿ 'caaⁿnúⁿ yā 'iiti ní
tee yā yuūtē vmnaaⁿ nátaí yeⁿe
Ndyuūs. Ní i'téenu yā 'iivú Ndyuūs
yeⁿe yú. Cuayiivi ní che'é yā yuūtē
miiⁿ. 'Tíicā 'iiⁿyāⁿ ch'i'í chi yeⁿé
Ndyuūs. ¹⁹Neⁿé caāⁿmáⁿ yeⁿé yuūtē
chi 'iiⁿyāⁿ che'é yā maaⁿ chi yeⁿe
nátaí yeⁿe ídolos. Nguéé véé poder
yeⁿe ídolos. Nguéé véé poder yeⁿe
yuūtē miiⁿ. ²⁰Chúú ní ngaⁿá. 'Iiⁿyāⁿ
chi ch'i'iⁿnúⁿ yā 'iiti s'eeⁿ ní tee yā
yuūtē nátaí yeⁿe ídolos díiⁿ yā chuū
cáávā yááⁿnguiniūⁿ s'eeⁿ. Ní nguéé

diíⁿ yā cáávā 'iivú Ndyuūs. 'Úú nguéeⁿ neⁿé chi che'é nī yuūtē miiⁿ yeⁿe nátaí miiⁿ, nī ndís'tii ní nguéeⁿ caⁿá nī lado yeⁿe yááⁿ'nguiniūⁿ.

²¹Ndís'tii nguéeⁿ cuuvi cu'ú nī vino yeⁿe taza nī yeⁿe chi véé na mesa yeⁿe Santa Cena yeⁿe Jesucristo nduuti chi cu'ú nī yeⁿe chi véé na mesa yeⁿe yááⁿ'nguiniūⁿ. Nguéeⁿ cuuvi yeⁿe Ndyuūs ndís'tii nduuti chi yeⁿe yááⁿ'nguiniūⁿ ndís'tii.

²²¿Áá neⁿe nī 'cuuⁿ'miiⁿ nī 'iivú Ndyuūs chi ca'á nī lado yeⁿe yááⁿ'nguiniūⁿ? ¿Áá ditiinú cá ndís'tii nguéeⁿ ti 'iivú Ndyuūs ti Ndyuūs nguéeⁿ diíⁿ yā castigar ndís'tii?

Yeⁿe chi 'iiⁿ'yāⁿ cuuvi diíⁿ yā ti i'teenú yā Jesucristo ní canee yā ndúúcu vaadi neⁿe yeⁿe Ndyuūs

²³Cuuvii diiⁿ yú tanducuéⁿe chi n'daacā, naati nguéeⁿ diiⁿ yú cosa chi nguéeⁿ n'daacā ti nguéeⁿ véé nuuⁿndi yeⁿe yú. Nguéeⁿ nducuéⁿe chi n'daacā chi diiⁿ yú nginee s'uuúⁿ chi yeⁿe Cristo. Ní dendu'ú miiⁿ chi n'daacā, nguéeⁿ n'daacā cá caavā s'uuúⁿ chi i'téenu yú 'iivú Ndyuūs.

²⁴Mar 'áamá 'iiⁿ'yāⁿ chi yeⁿe Cristo damaáⁿ yā nadacadíinuⁿ yā dendu'ú chi yeⁿe maáⁿ yā, naati nadacadíinuⁿ ntúuⁿ yā yeⁿe chi neⁿe tanáⁿ'ā 'iiⁿ'yāⁿ.

²⁵Yúútē chi 'iiⁿ'yāⁿ in'diicuí yā níí'vēē cuuvi che'é nī. Ní nguéeⁿ itínguuneeⁿ nī yeⁿe yuūtē miiⁿ. 'Tíicā diíⁿ nī ní nguéeⁿ dinuuⁿndí nī.

²⁶Ní yáⁿ'āa ndúúcu nducuéⁿe chi véé vmnaaⁿ yeⁿe ní yeⁿe 'iivú Ndyuūs.

²⁷Nduuti chi 'aama 'iiⁿ'yāⁿ chi nguéeⁿ i'téenu yā Jesucristo diíⁿ yā invitar ndís'tii chi che'é nī ndúúcu

yā, ní nduuti chi neⁿé nī tuuⁿ'mi ní caⁿá nī ndúúcu yā. Tanducuéⁿe chi cun'duú yā na mesa ní che'é nī. Nguéeⁿ tiinguuneeⁿ nī dē'ē vee yeⁿe chi che'é nī. 'Tíicā nguēe dinuuⁿndí nī. ²⁸Nduuti chi 'áamá 'iiⁿ'yāⁿ ngaⁿ'a yā ngii yā ndís'tii chuu: Yúúte 'cūū ní canée vmnaaⁿ nátaí yeⁿe ídolos, tuuⁿ'mi ní nguéeⁿ che'e nī yuūtē miiⁿ. Ní nguéeⁿ diíⁿ nī chi 'iiⁿ'yāⁿ miiⁿ cuuvi nadacadíinuúⁿ yā chi dinuuⁿndí nī. Ní yáⁿ'āa ndúúcu nducuéⁿe chi véé vmnaaⁿ yeⁿe ní yeⁿe 'iivú Ndyuūs. ²⁹'Úú ngaⁿ'ā ngii ndís'tii chuū. Nguéeⁿ che'é nī yuūtē miiⁿ chi yeⁿe nátaí taachi 'iiⁿ'yāⁿ ngaⁿ'ā yā chi che'é nī yuūtē miiⁿ, ti 'iiⁿ'yāⁿ nadacadíinuúⁿ yā chi véé nuuⁿndi yeⁿe nī taachi che'é nī yuūtē miiⁿ. 'Úú deenú chi cuuvi che'é yuūtē miiⁿ ní nguéeⁿ idinuⁿndí. 'Iiⁿ'yāⁿ chi duuⁿ'vī déenu yā yeⁿe Jesucristo nguéeⁿ cuuvi che'e yā. 'Túúca yúúte 'cūū, ní diíⁿ yā juzgar cosa chi nguéeⁿ ituneeⁿ yā. 'Úú deenú chi nguéeⁿ véé poder yeⁿe ídolos. 'Úú caⁿ'á, gracias Ndyuūs caava yuūtē miiⁿ, ní che'é yuūtē miiⁿ.

³⁰Ndúúti chi caⁿ'á, gracias Ndyuūs cáávā yuūtē chi che'é, ¿dē'ē cuuvi chi cunncaā ngaⁿ'a yā yeⁿe 'úú yeⁿe chi che'é? ³¹Diíⁿ nī tan'dúúca chi ngaⁿ'á. Ní nduuti chi nge'e nī, o ngiiⁿ nī, o yeⁿe táamá cosa chi diíⁿ nī, ndís'tii diíⁿ nī tanducuéⁿe cucáávā chi cuuvi dich'etē n'dai nī Ndyuūs. ³²Nguéeⁿ diíⁿ nī cosa chi 'iiⁿ'yāⁿ Israel s'eeⁿ o 'iiⁿ'yāⁿ s'eeⁿ chi nguéeⁿ ndaata Israel, o 'iiⁿ'yāⁿ s'eeⁿ chi i'téenu yā Jesucristo yeⁿe yú cuuvi nadacadíinuⁿ yā chi véé nuuⁿndi yeⁿe nī. ³³'Áa tíí nūuⁿ lugar taachi 'úú caneeⁿ, 'úú idiíⁿ tanducuéⁿe chi

cunée yinu 'iiⁿ'yāⁿ na lugar miiⁿ.
Nguée idiíⁿ cosa chi neⁿ'é maáⁿ,
ti diíⁿ tanducuéⁿ'ē ní 'licu cuuvi
nanguáⁿ'ai 'iiⁿ'yāⁿ.

11 Ndís'tií ní diíⁿ nī tan'dúúca
chi 'úú idiíⁿ ti 'úú idiíⁿ
tan'dúúca chi Cristo chí'cueeⁿ yā 'úú.

Yeⁿ'ē n'daata s'ééⁿ chí caⁿ'á yā yaācū

²'Úú ngaⁿ'á n'daacā yeⁿ'e ndís'tií
hermanos yeⁿ'é ti n'gaacú nī yeⁿ'e
'úú, ndúúcu tanducueⁿ'ē dendu'ū. Ní
diíⁿ nī tan'dúúca chi 'úú ngi'cueeⁿ
ndís'tií. ³'Úú neⁿ'é chi cadíínūⁿ
ndís'tií chi Cristo miiⁿ ní ngaⁿ'a
ntiiⁿnyúⁿ yā yeⁿ'ē nducyaaca saⁿ'ā.
'Íícú saⁿ'ā ní ngaⁿ'ā ntiiⁿnyuⁿ sa
yeⁿ'e n'daataá yéⁿ'e sa. 'Íícú Ndyuūs
Chiida yú ngaⁿ'ā ntiiⁿnyúⁿ yā yeⁿ'e
Cristo miiⁿ. ⁴Nducyáácá saⁿ'ā chí
ngaⁿ'ángua'a sa o ngaⁿ'a sa nduudu
yeⁿ'é Ndyuūs ndúúcu sndiíⁿ yeⁿ'ē
sa chi canúúⁿ tiíⁿ sa, ngíí 'cuináaⁿ
sa. ⁵Nducyáácá n'daataá chi
ngaⁿ'angua'a tá o ngaⁿ'a tá nduudu
yeⁿ'é Ndyuūs ní nguée ndeecu
pañó yeⁿ'e tá tiíⁿ tá, ngíí 'cuináaⁿ
tá ti idiíⁿ tá tan'dúúca chi ndíí
tiíⁿ ta. ⁶Ndúúti chi nguée ndeecu
pañó yeⁿ'e tá tiíⁿ tá tuu'mi ní cuú
tá yuudū tiíⁿ tá. Nduuti chi 'aama
n'dáataá ngíí 'cuináaⁿ tá chi ndíí
tiíⁿ tá, tuu'mi ní canée chi cheecu
pañó yeⁿ'e tá tiíⁿ tá. ⁷Saⁿ'ā ní nguée
cánée chi caaⁿ'maⁿ sa nduudu yeⁿ'é
Ndyuūs ndúúcu sndiíⁿ yeⁿ'ē sa chi
canuuⁿ tiíⁿ sa, ti Ndyuūs din'dái
yā saⁿ'ā tan'dúúca maáⁿ yā chi
caaⁿ'maⁿ ntiiⁿnyuⁿ sa, 'tíicā. Saⁿ'ā
s'uūuⁿ, saⁿ'ā ní diíⁿ sa ntiiⁿnyuⁿ yeⁿ'e
Ndyuūs. N'daataá nguée 'tíicā. Idiíⁿ
tá chííⁿ chí ngaⁿ'a isaⁿ'ā yeⁿ'e tá, ti
saⁿ'ā miiⁿ caaⁿ'maⁿ ntiiⁿnyuⁿ sa

yeⁿ'ē n'daata miiⁿ. ⁸Ti Ndyuūs nguée
din'dái yā saⁿ'ā yeⁿ'e n'daataá naati
din'dái yā n'daataá yeⁿ'e sáⁿ'ā. ⁹Ti
Ndyuūs nguée din'dái yā saⁿ'ā chí
dichíí'vē sa n'daataá, naati din'dái
yā n'daataá chí dichíí'vē tá saⁿ'ā.

¹⁰N'daataá ní canée chí ndeecu
pañó yeⁿ'ē tá tiíⁿ tá ti ch'iⁿ'i tá chí
nguée caaⁿ'maⁿ ntiiⁿnyuⁿ tá. 'Tiicā
ntuūⁿ ángel s'eeⁿ ní chí canuúⁿ
tiinuú náaⁿ yā taachí canee yā
nanáaⁿ 'iivú Ndyuūs. ¹¹Ndyuūs diíⁿ
yā chí sáⁿ'ā nguée canee sa dāmāaⁿ
sa, ndíí nguée n'daataá canee tá
dāmāaⁿ tá. Ndyuūs diíⁿ cuenta chí
saⁿ'ā ní n'daataá daama daamá
yā nanaaⁿ yā ti Jesucristo ch'iⁿ yā
cucáāvā nduu 'uuví 'iiⁿ'yāⁿ s'uuⁿ.

¹²Vmnááⁿ vmnaaⁿ n'daata miiⁿ ní
yeⁿ'e saⁿ'ā. Maaⁿ ní saⁿ'ā ch'iindiyáaⁿ
sa yeⁿ'ē n'daataá naati tanducuéⁿ'ē
dendu'ū ní yeⁿ'é 'iivú Ndyuūs.

¹³¿De'ē nadacadiinúuⁿ nī yeⁿ'e
chuū? ¿Áá n'daacā chí n'daata
caaⁿ'maⁿngua'a tá ndúúcu Ndyuūs
'aara chí nguée ndeecu paño yeⁿ'ē tá
tiíⁿ tá? ¹⁴Nducyáácá 'iiⁿ'yāⁿ deenú yā
chí saⁿ'ā chí n'géénūu yuūdū tiíⁿ sa
ti 'cuináaⁿ sa. ¹⁵Nduuti chí n'daata
n'géénūu tiíⁿ tá n'daacā yeⁿ'ē tá. Ní
yuūdū tiíⁿ tá n'daacā chí in'díí tiíⁿ tá
chí tan'dúúca 'áamá paño. ¹⁶Nduuti
chí 'iiⁿ'yāⁿ neⁿ'e caaⁿ'maⁿ taáⁿ yā yeⁿ'e
chuū, 'úú nguée cuuvi caāⁿ'maⁿ cá
yeⁿ'ē ti 'tíicā costumbre yeⁿ'ē yú. 'Tiicā
ntuūⁿ costumbre yeⁿ'e nducyaaca
'iiⁿ'yāⁿ chí i'téenu yā Jesucristo.

**Cosas chí nguée n'daacā idiíⁿ
yā taachi che'é yā Santa Cena
yeⁿ'ē Señor Jesucristo**

¹⁷Maaⁿ ní 'úú idinguúⁿ yeⁿ'é
ndís'tií ti nguée n'daacā dííⁿ nī.

Taachi nduuvidaamá nī nguée n'daacā ca idííⁿ nī ti cunncaā ca idííⁿ nī. ¹⁸Úú n'giindiveeⁿ chi ndís'tiī nguée daama vaadi cadiinuuⁿ yeⁿe nī taachi nduuvidaamá nī ná yaācū. Véé 'téé chi i'teenú chi cuaacu chi ch'iindiveeⁿ. ¹⁹Canée chi véé chi nduuvidaamá 'āā ví'í caā ndís'tiī chi i'téenu nī Jesucristo, ti cuuvi deenú nī cheé hermanos nguaaⁿ ndís'tiī chi 'áamá canee yā chí i'téenu cá yā. ²⁰Taachi 'āā ví'í caā nduuvidaamá nī ní che'é nī Santa Cena yeⁿe Señor Jesucristo nguée che'é nī Cena miiⁿ tan'dúucā chi Jesucristo caⁿa ntiin'nyúⁿ yā. ²¹Ndís'tiī nguée canee ngínú nī taachi ndaa nducyaaca hermanos naati ca'áamá ca'aamá nī diiⁿ núúⁿ yiinu nī ní caⁿ'á nī na yāacū ní che'é nī Cena yeⁿe nī. Ní taachi ndaa tiempo chi che'é nī Santa Cena náⁿa nī ní cuicu nī. Tanáⁿa nī ní cuu'vi nī. ²²¿Déé chuū? ¿Áá nguée véé va'ai yeⁿe nī naachi cuuvi che'e nī ní cu'u nī? Nduuti chi nguée neⁿ'é nī repartir Cena yeⁿ'é nī, ¿déé cuuví chí candéé nī Cena yeⁿ'é nī cheeti yaācū? Nguée n'daacā idííⁿ nī taachi nduuvidaamá nī na yaācū yeⁿe 'iivú Ndyuūs. Dííⁿ nī cosa chi cuuvi 'cuinááⁿ 'iiⁿ'yāⁿ chi nguée véé chi che'e yā. ¿Déé neⁿ'é nī chi 'úú caaⁿ'máⁿ ndúucū ndís'tiī yeⁿe chuū? ¿Áá neⁿ'é nī chi 'úú caaⁿ'máⁿ ndúucū ndís'tiī chi n'daacā idííⁿ nī? Nguée cuuvi caaⁿ'máⁿ 'tiicā.

**Chuū historia yeⁿ'ē Santa Cena yeⁿ'e
Señor Jesucristo**

(Mt. 26.26-29; Mr. 14.22-25; Lc. 22.14-20)

²³Iivú Señor Jesucristo chii yā 'úú chiiⁿ chi 'úú ca'cueeⁿ ndís'tiī. Nguiinū miⁿ chi 'āā cuéeⁿ nca'a

Judas Iscariote miiⁿ Jesucristo chi ndíí yā preso na ta'á 'iiⁿ'ntyéⁿ'ē, Jesús miiⁿ ní sta'a yā pan. ²⁴Ch'iinu Jesús nca'a gracias Ndyuūs cáāvā pan miiⁿ, tuu'mi ní n'deé yā pan. Ní Jesús ní caⁿ'a yā chii yā discípulos yeⁿ'e yā: Ndís'tiī cuta'á nī ní che'e nī. Pan 'cūū chi 'úú n'deé tan'dúucā cuerpo yeⁿ'é 'tíicā. Ní cuerpo yeⁿ'é ca'á chí n'deé cucáāvā ndís'tiī. Nadiíⁿ nī chuū, ní taachi nache'é nī pan miiⁿ ní nan'gaacú nī yeⁿ'ē 'úú cueⁿ'e daāⁿmaⁿ. ²⁵Cuayiivi chi che'é nī pan 'cūū Jesús sta'a ntúuⁿ yā taza chi s'néeⁿ vino ní ngaⁿ'a yā: Vino cheeti taza 'cūū ní tan'dúucā yuuúⁿ yeⁿ'é 'tíicā. Ndúucū yuuúⁿ yeⁿ'é idííⁿ 'áamá compromiso chí ngai. Nadiíⁿ nī chuū ní taachi nangi'í nī vino miiⁿ nan'gáacú nī yeⁿ'ē 'úú cueⁿ'e daāⁿmaⁿ. ²⁶Maaⁿ ní taachi che'é nī pan 'tíicā, ní cu'ú nī vino yeⁿ'e taza 'tíicā, tuu'mi ní ch'iⁿ'í nī 'iiⁿ'yāⁿ chi Jesucristo ch'iⁿ yā caavā ndís'tiī. Nadiíⁿ nī Cena 'cūū ndii tiempo chi ndaa Jesucristo taama vmnéⁿ'ēe.

**Yeⁿ'e táacā cuuvi che'e yú Santa
Cena yeⁿ'e Señor Jesucristo**

²⁷Iiⁿ'yāⁿ chi nge'é yā pan yeⁿ'e Cena 'cūū ní ngi'í ntúuⁿ yā vino yeⁿ'e taza yeⁿ'e Santa Cena yeⁿ'e Jesucristo, canée chi canée ndúucū staava yeⁿ'é yā dæeve nanááⁿ Dendyuūs. Nduuti chi nguée dæeve staava yeⁿ'é yā nanááⁿ Dendyuūs taachi che'é yā Cena miiⁿ, tuu'mi ní diiⁿ nuuⁿ'ndí yā contra cuerpo yeⁿ'e Señor Jesucristo ndúucú yuuúⁿ yēⁿ'e yā dendu'ū, ti nguée dííⁿ yā respetar Jesucristo. ²⁸Caava chúū 'áamá 'áamá 'iiⁿ'yāⁿ chi neⁿ'é yā che'é yā yeⁿ'e Santa Cena yeⁿ'e Señor

Jesucristo, canéé chi n'diichi maáⁿ yā ndúúti chí dēeve staava yeⁿ'é yā nanááⁿ Dendyuūs. Taachí dēeve staava yeⁿ'é yā nanááⁿ Dendyuūs tuu'mi ní cuuvi che'e yā pan yeⁿ'e Santa Cena yeⁿ'ē Señor Jesucristo, ní cu'ú yā vino yeⁿ'e taza yeⁿ'ē Cena 'cūū. ²⁹Iiⁿ'yāⁿ chi nge'é yā ní ngi'i yā yeⁿ'e Cena yeⁿ'ē Señor Jesucristo ní nguée nacádiinúⁿ yā yeⁿ'e cuerpo yeⁿ'e Jesús chí ch'i caava s'uúúⁿ, Dendyuūs diíⁿ yā castigar 'iiⁿ'yāⁿ miiⁿ. Vée nuuⁿndi yeⁿ'é yā nanááⁿ 'iivú Ndyuūs. Maáⁿ yā dinuuⁿndí yā ní diiⁿ yā chi cuuví castigado yā. ³⁰Cáávā chi diíⁿ nī 'túúcā, 'yaaⁿ n'dái ndís'tii ní duuva nī, ní náⁿ'a nī ní ngííta nī, tanáⁿ'ā ní ch'i nī nguaaⁿ ndís'tii. ³¹Ndúúti chi s'uúúⁿ n'diichi maaⁿ yú chi n'daacā canee yú nanááⁿ Ndyuūs yeⁿ'ē yú, Ndyuūs nguée diíⁿ yā castigar s'uúúⁿ.

³²Taachi 'iivú Ndyuūs n'diichí yā nuuⁿndi yeⁿ'ē yú ní nguée dēeve staava yeⁿ'ē yú taachi che'e yú Santa Cena yeⁿ'ē Jesucristo, tuu'mi ní teé yā 'aama castigo s'uúúⁿ. Nífcú nadacadíinuⁿ yú yeⁿ'e nuuⁿndi yeⁿ'e yú. Ní 'ífcú nguée canee yú condenado tan'dúúcā tanáⁿ'ā 'iiⁿ'yāⁿ yeⁿ'e iⁿ'yeeⁿdí 'cūū chi nguée i'téenu yā 'iivú Ndyuūs.

³³Maaⁿ ní ndís'tii hermanos yeⁿ'é, taachi nduuvidaamaⁿ nī ní che'é nī Santa Cena yeⁿ'e Jesucristo 'cuēstinee ngiinú nī ti ndāā tanáⁿ'ā hermanos yeⁿ'é nī. ³⁴Nduuti chi 'áámá 'iiⁿ'yāⁿ cuicú yā, canéé chí ch'éé yā na vaacú yā. Tuu'mi ní nducyaaca nī nduuvidaama nī na yaacū ní che'é nī Santa Cena yeⁿ'e Señor Jesucristo. 'Tífcā cuuvi che'é nī pan ní ngi'í nī vino ní

diíⁿ nī respetar Señor Jesucristo. Ní n'diichí Ndyuūs chí nguée vée nuuⁿndi yeⁿ'é nī. Tan'dúúcā tanáⁿ'ā chí vée 'úú caaⁿ'máⁿ yeⁿ'ē taachi ndāā ní cuneé ndúúcu nī.

**Yeⁿ'ē nducueⁿ'ē chi Espíritu
N'dai yeⁿ'é Ndyuūs téé yā s'uúúⁿ
ti yeⁿ'é Señor Jesucristo**

12 Maaⁿ ní 'úú neⁿ'é idinguúⁿ yeⁿ'e chí nca'a Espíritu N'dai yeⁿ'é Ndyuūs s'uúúⁿ. Neⁿ'é chí cadíinuⁿ nī chuū. ²Ndís'tii chí nguée 'iiⁿ'yāⁿ yeⁿ'e ndaata Israel ndís'tii, ti taachi 'āā cuée i'teenú nī Señor Jesucristo diíⁿ nī tan'dúúcā costumbre yeⁿ'é nī ní s'téenu nī ídolos chí nguée cuuví caāⁿ'maⁿ. ³Neⁿ'é chí ndis'tii cadíinuⁿ nī chuū. 'Iiⁿ'yāⁿ chí canee ndúúcū Espíritu N'dai yeⁿ'é Ndyuūs ní ngaⁿ'á yā nduudu cuaacu yeⁿ'é Dendyuūs, nguée cuuvi caaⁿ'máⁿ yā contra yeⁿ'e Jesucristo. 'Iiⁿ'yāⁿ chí ngaⁿ'á yā chí Jesucristo ní 'iivú Ndyuūs yeⁿ'e yā, ngaⁿ'a yā 'túúcā ti Espíritu N'dai yeⁿ'é Ndyuūs diíⁿ yā chí 'túúcā chí ngaⁿ'a yā.

⁴Espíritu N'dai yeⁿ'é Ndyuūs tee yā ntiiⁿnyuⁿ s'uúúⁿ chí 'āā vi'i caā ntiiⁿnyuⁿ yeⁿ'ē 'áámá 'áámá s'uúúⁿ. Ní tee yā poder s'uúúⁿ chí cuuvi diíⁿ yú ntiiⁿnyuⁿ miiⁿ chí 'āā vi'i caā. Niicu vée 'áámá n'dyáⁿ'ā Espíritu N'dai yeⁿ'é Ndyuūs. ⁵Idiiⁿ yú ndee nááⁿ ntiiⁿnyuⁿ chí 'āā vi'i caā chí yeⁿ'e 'iivú Ndyuūs, naati nducyaaca ntiiⁿnyuⁿ miiⁿ ní yeⁿ'e 'áámá n'dyáⁿ'ā 'iivú Ndyuūs. ⁶N'dee nááⁿ ntiiⁿnyuⁿ yeⁿ'e Dendyuūs vée chí idiiⁿ yú ní Ndyuūs ngínnee yā 'áámá 'áámá s'uúúⁿ. ⁷Ndyuūs tee yā Espíritu N'dai yeⁿ'é yā s'uúúⁿ ní Espíritu

miiⁿ nginnee s'uuúⁿ. Ní s'uuúⁿ cuuvi cunnee yú nducyaaca 'iiⁿ'yāⁿ chí i'téenu yā Señor Jesucristo chí 'iivi yú. ⁸Espíritu N'dai miiⁿ ní cunnee tanáⁿ'ā 'iiⁿ'yāⁿ chí ngaⁿ'a n'dááca yā nduudu yeⁿ'é Ndyuūs. Espíritu N'dai yeⁿ'é Ndyuūs nginnee naⁿ'a 'iiⁿ'yāⁿ chí cuuvi caaⁿ'maⁿ yā ndúúcū vaadī deenú ca. Dámaāⁿ 'áámá n'dyāⁿ'ā Espiritu N'dai miiⁿ diiⁿ chuú. ⁹Ní Espiritu N'dai miiⁿ ní nginnee nducyaaca 'iiⁿ'yāⁿ chí i'téenu cá yā Dendyuūs. Ní Espiritu N'dai nginnee náⁿ'ā 'iiⁿ'yāⁿ ní ca'á poder miiⁿ 'iiⁿ'yāⁿ s'uuⁿ chí 'iiⁿ'yāⁿ s'uuⁿ cuuvi diiⁿ yā chí nduūvā yeⁿ'é 'iiⁿ'yāⁿ chí ngiitā. ¹⁰Espiritu N'dai miiⁿ ca'á naⁿ'a 'iiⁿ'yāⁿ chí idiíⁿ yā vaadī n'giinuú ní nga'a poder náⁿ'ā 'iiⁿ'yāⁿ chí cuuvi candéé yā nduudu cuaacu yeⁿ'é Ndyuūs. Espíritu N'dai miiⁿ ní diiⁿ chí náⁿ'ā 'iiⁿ'yāⁿ cuuvi déenu yā chæ 'iiⁿ'yāⁿ ngaⁿ'á yā caavā Espiritu N'dai yeⁿ'é Ndyuūs o cáávā espíritu yeⁿ'e yáá'n'guiinūⁿ. Ní Espiritu N'dai ca'a náⁿ'a yā poder chí caaⁿ'maⁿ yā n'deee náⁿ'a davaacu, ní náⁿ'a yā chí caⁿ'a yā chíⁿ chí neⁿ'e caāⁿ'maⁿ nduudu miiⁿ. ¹¹'Áámá n'dyāⁿ'ā Espiritu N'dai yeⁿ'é Ndyuūs tee yā poder 'áámá 'áámá s'uuúⁿ chí cuuvi diiⁿ yú ntiíⁿnyuⁿ yeⁿ'é yā tan'dúúcā chí néⁿ'e yā.

**S'uuúⁿ ní tan'dúúcā chí s'uuúⁿ
ní 'áámá cuerpo nūⁿ s'uuúⁿ**

¹²Tíicā véé 'áámá cuerpo yeⁿ'ē yú ní nééné n'deee náⁿ'a chí véé yeⁿ'ē. Ní ndúúcū n'deee náⁿ'a chí véé yeⁿ'ē, ní yeⁿ'ē 'áámá cuerpo nūⁿ, 'túúcā. Cucáávā chí yeⁿ'e Jesucristo s'uuúⁿ, tuu'mi s'uuúⁿ ní tan'dúúcā chí s'uuúⁿ ní 'áámá cuerpo nūⁿ s'uuúⁿ. Ní

cuerpo miiⁿ ní Jesucristo miiⁿ. ¹³Ti cááva Espiritu N'dai yeⁿ'é Ndyuūs miiⁿ ngeēdinuūⁿníⁿ yú ní maaⁿ ní s'uuúⁿ ní yeⁿ'ē 'áámá cuerpo s'uuúⁿ. Nduuti chí 'iiⁿ'yāⁿ Israel chí judíos s'uuúⁿ, o 'iiⁿ'yāⁿ griegos s'uuúⁿ o 'iiⁿ'yāⁿ chí snéé caadi 'iiyu s'uuúⁿ, o 'iiⁿ'yāⁿ chí diiⁿ ntiíⁿnyuⁿ cáávā maáⁿ yā s'uuúⁿ, nducyaaca s'uuúⁿ ní yeⁿ'ē 'áámá Espiritu N'dai yeⁿ'é Dendyuūs.

¹⁴Tíicā cuerpo yeⁿ'ē yú, ní nguéé 'áámá n'dyāⁿ'ā nūⁿ ti 'yaaⁿ n'dái yeⁿ'ē. ¹⁵Ndúúti chí ca'a yú chí ngí ngaⁿ'a ní miiⁿ ní caāⁿ'maⁿ: Caati 'úú nguéé 'áámá ta'á 'úú nguéé yeⁿ'e cuerpo yeⁿ'e yú. ¿'Áá nadacadíínuuⁿ ní chí cáávā chíiⁿ chí caⁿ'a ca'a yú, ní ca'a yú nguéé yeⁿ'e cuerpo yeⁿ'e yú? Nguéé 'tíicā. ¹⁶Ndúúti chí veeⁿ yú chí ngí ngaⁿ'a ní miiⁿ ní caāⁿ'maⁿ: Caati 'úú ní nguéé 'áámá nduutināⁿ 'úú nguéé yeⁿ'e cuerpo yeⁿ'ē yú. ¿'Áá nadacadíínuuⁿ ní chí cáávā chíiⁿ chí caⁿ'a veeⁿ yú, ní veeⁿ yú nguéé yeⁿ'ē cuerpo yeⁿ'e yú? Nguéé 'tíicā. ¹⁷Nduuti chí nuuⁿmaⁿ cuerpo yeⁿ'ē yú ní 'áámá nduutinaaⁿ yú tuu'mi ní 'taacā cúúví 'caandiveeⁿ yú? Ní ndúúti chí nuuⁿmáⁿ cuerpo yeⁿ'ē yú ní veeⁿ yú tuu'mi ní 'taácā cuuvi 'táaⁿ'nuⁿ yú? ¹⁸Dendyuūs s'néeⁿ yā ca'áámá ca'áámá chí canee yeⁿ'ē cuerpo yeⁿ'ē yú na lugar naachi canee yiinú yā. ¹⁹Nduuti chí cuerpo yeⁿ'ē yú ní 'áámá parte nūⁿ 'itií canéé nducuéⁿ'ē cuerpo yeⁿ'ē yú? ²⁰Tíicā Dendyuūs din'dái yā 'áámá cuerpo yeⁿ'ē yú chí n'deee náⁿ'a chí væ naati véé 'áámá cuerpo yeⁿ'ē yú.

²¹Nduuti chí nduutinaaⁿ yú chí ngí ngaⁿ'a ní miiⁿ ní caāⁿ'maⁿ yeⁿ'e ta'á yú 'tíicā: Dii ta'á, nguéé dichíí'vē

di. 'Tiicá ntúū tiīⁿ ra yú ni caaⁿmaⁿ yeⁿē ca'ā yú 'tiicā: Díí ca'á, nguée dichíí'vē dii. Nguée cuuvi 'tíicā.

²²Dendu'ū chi snée na cuerpo yeⁿe yú chi duūvā ni 'lííⁿ chi nguée diiⁿ yú cuenta yeⁿē, chííⁿ chi neené dichíí'vē s'uuúⁿ. ²³Dendu'u chi yeⁿe cuerpo yeⁿē yú chí nacadiinuⁿ yú chi nguée importante, chuū ní diiⁿ yú cuidado yeⁿē tan'dúucā chí ch'ēete ca. Dendu'ū yeⁿe cuerpo yeⁿe yú chi nguée neⁿe yú chi 'iiⁿyāⁿ n'diichi yā chi n'díi yú ndúucū catecai yú. ²⁴Tanáⁿā parte yeⁿe cuerpo yeⁿe yú āā n'daacā canee 'āā tiiní caā. Dendyuūs dííⁿ yā cuerpo yeⁿe yú ní dííⁿ yā chi cundēē ca yú cuidado yeⁿē nducuéⁿē chi nadacādiinuⁿ yú chi nguée importante yeⁿe cuerpo yeⁿe yú. ²⁵Chuū ní dííⁿ Dendyuūs chi nducuéⁿē parte yeⁿe cuerpo n'daacā diiⁿ ntiíⁿnyūⁿ yeⁿē cuerpo yeⁿe yú. Ní nducuéⁿē cuerpo yeⁿe yú diiⁿ yú cuidado 'áámá parte yeⁿē yú ndúucū táámá parte yeⁿe yú. ²⁶Nduuti chi diiⁿ yú cuidado yeⁿe 'áámá dendú'ū nūⁿ yeⁿe cuerpo yeⁿe yú ti diiⁿ sufrir, tuu'mi ní nuuⁿmaⁿ ch'ēete cuerpo yeⁿe yú diiⁿ sufrir. Nduuti chi dich'ēetē yā 'áámá dendu'ū yeⁿe cuerpo yeⁿē yú tuu'mi ní núúⁿmáⁿ cuerpo yeⁿe yú ní yeenú taavi.

²⁷Chuū chi caaⁿmaⁿ. Maaⁿ ní nducyaaca ndís'tiī ní yeⁿe cuerpo yeⁿe Cristo Jesús. Ní ca'áámá ca'áámá nī véē parte yeⁿe cuerpo yeⁿe Cristo Jesús. ²⁸Ndyuūs tee yā ntiíⁿnyuⁿ ca'áámá ca'áámá s'uuúⁿ chi i'teenu yú Jesucristo. Vmnaáⁿ vmnaaⁿ ca'a yā ntiíⁿnyuⁿ chí ch'ēete ca chí ntiíⁿnyuⁿ yeⁿe apóstoles

chi dichó'ó Dendyuūs. Cuayiivi ní tee yā tanáⁿā yú ntiíⁿnyuⁿ yeⁿe profetas chi ndēē yú nduudu yeⁿē 'iivú Ndyuūs. Cuayiivi ní tee yā tanáⁿā yú ntiíⁿnyuⁿ chi maestros yeⁿe nduudu yeⁿē Ndyuūs. Ní tanáⁿā yú Ndyuūs tee yā ntiíⁿnyuⁿ s'uuúⁿ chi diiⁿ yú vaadi n'giinu. Tuu'mi ní tee yā tanáⁿā yú ntiíⁿnyuⁿ chi diiⁿ yú chí induūvā yeⁿe 'iiⁿyāⁿ. Tee yā tanáⁿā yú ntiíⁿnyuⁿ chí cunnee yú 'iiⁿyāⁿ. Tee yā tanáⁿā yú ntiíⁿnyuⁿ chi caaⁿmaⁿ ntiíⁿnyuⁿ yú yeⁿe 'iiⁿyāⁿ chi cunnee yā 'iiⁿyāⁿ chi dííⁿ yā ntiíⁿnyuⁿ yeⁿē Ndyuūs. Ní teé yā ntiíⁿnyuⁿ tanáⁿā yú chi ngaⁿa yú n'deeē nááⁿ davaacu. ²⁹¿Áá nadacadíinuⁿ nī chi nducyaaca yú apóstoles? ¿Áá nadacadíinuⁿ nī chi nducyaaca yú profetas chi ndēē nduudu yeⁿē 'iivú Ndyuūs? ¿Áá nadacadíinuⁿ nī chí nducyaaca yú maestros yeⁿē nduudu yeⁿē Ndyuūs? ¿Áá nducyaaca yú diiⁿ yú vaadi n'giinu? ³⁰¿Áá nducyaaca yú cuuvi diiⁿ yú chi nduuvā yeⁿe 'iiⁿyāⁿ? ¿Áá nducyaaca yú ngaⁿa yú n'deeē 'naaⁿ davaacu? ¿Áá nducyaaca yú cuuvi caaⁿmaⁿ yú chi neⁿe caaⁿmaⁿ táámá davaacu? Nguée 'tíicā. ³¹Canée chi diiⁿ yú ntiíⁿnyuⁿ yeⁿē Dendyuūs tan'dúucā chi Dendyuūs neⁿē yā chí diiⁿ yú. Ní caavā s'uuúⁿ ní ntiíⁿnyuⁿ miiⁿ ní n'daacā ca. Maaⁿ ní 'úú 'cuuⁿmíⁿ ndís'tiī táacā cuuvi chí diiⁿ yú chí más cā n'daacā ca.

Yeⁿe vaadi neⁿe chí ch'ēete n'daí

13 Nduuti chi s'uuúⁿ caaⁿmaⁿ yú tan'dúucā chí ngaⁿa 'iiⁿyāⁿ chí deenu, o tan'duucā chí ngaⁿa ángeles, ní nguée neⁿe yú

nducyaaca 'iiⁿ'yāⁿ, tuu'mi ní nduudu yeⁿ'e yú tan'duucā 'áámá cūū 'lííⁿ chí n'geecu, o tan'dúúćā 'áámá cu'u lata chí d'í'cuēćú yú. ²Ndúúti chí Ndyuūs tee yā ntiⁿ'nyuⁿ s'uuúⁿ chí cuuvi caaⁿ'maⁿ yú dendú'ū chí cuchii, ní nduuti chí cadiinuuⁿ yú nducuéⁿ'ē chí yeⁿ'é Ndyuūs chí nguēē deenu tanáⁿ'a yā, ní nducuéⁿ'e vaadi deenu chí yeⁿ'ē iⁿ'yeeⁿ'dí 'cūū, ní nguéé neⁿ'e yú nducyaaca 'iiⁿ'yāⁿ, tuu'mi ní chiiⁿ chí diiⁿ yú nguéé dichíí'vē nanááⁿ Dendyuūs. Ní nduuti chí i'teenu ca yú Dendyuūs chí cuuvi caaⁿ'maⁿ yú yeⁿ'ē 'áámá yīicū 'tíicā: N'dii yīicū, divíi nī yeⁿ'ē 'muuⁿ, ní yīicū miiⁿ caⁿ'ā taama lado. Ní nduuti chí nguéé neⁿ'e yú nducyaaca 'iiⁿ'yāⁿ, tuu'mi ní chiiⁿ chí diiⁿ yú nguéé dichíí'vē nanááⁿ Dendyuūs. ³Ndúúti chí ca'a yú nducuéⁿ'ē chí véé yeⁿ'e yú 'iiⁿ'yāⁿ chí nguéé yeⁿ'é yā, ní 'áará chí ca'a yú maaⁿ cuerpo yeⁿ'e yú chí 'iiⁿ'yāⁿ cuucú yā s'uuúⁿ cucáávā chí ngaⁿ'a yú nduudu cuaacu, ní nguéé neⁿ'e yú nducyaaca 'iiⁿ'yāⁿ, tuu'mi ní nguéé de'ē vēē chí diiⁿ yú chí dichíí'vē nanááⁿ Dendyuūs.

⁴Ndúúti chí s'uuúⁿ ní neⁿ'e yú nducyaaca 'iiⁿ'yāⁿ ní nguéé caaⁿ'maⁿ taaⁿ yú ndúúćū 'iiⁿ'yāⁿ ní cucheē yú tanducuéⁿ'e tuu'mi ní neene n'dai yú. Ndúúti chí s'uuúⁿ neⁿ'e yú nducyaaca 'iiⁿ'yāⁿ ní nguéé nguēē yú chiiⁿ chí naaⁿ yú chí véé yeⁿ'e 'iiⁿ'yāⁿ. Ní nguéé nadacadíínuuⁿ yú chí ch'ēete n'dai yú. Ní nguéé maāⁿ yú caaⁿ'maⁿ yú chí ch'ēete n'dai maāⁿ yú. ⁵Ndúúti chí s'uuúⁿ neⁿ'e yú nducyaaca 'iiⁿ'yāⁿ nguéé a fuerza diiⁿ yú dámaāⁿ chiiⁿ chí neⁿ'e yú.

Ní nguéé nadacadíínuuⁿ yú dámaāⁿ yeⁿ'e maaⁿ yú, naati nginneē yú 'iiⁿ'yāⁿ chí di'vaachi. Ní cucheē yú taachí 'iiⁿ'yāⁿ s'eeⁿ d'í'vaāchí yā s'uuúⁿ. Ní nguéé nadacadíínuuⁿ yú yeⁿ'ē chí nguéé n'daacā. ⁶Nduuti chí s'uuúⁿ neⁿ'e yú nducyaaca 'iiⁿ'yāⁿ nguéé yeenu yú taachi táámá 'iiⁿ'yāⁿ diíⁿ yā chí nguēē n'daacā, ti yeenu yú taachi 'iiⁿ'yāⁿ diíⁿ yā dendu'ū chí n'daacā. ⁷Nduuti chí s'uuúⁿ neⁿ'e yú nducyaaca 'iiⁿ'yāⁿ tuu'mi ní cucheé yú tanducuéⁿ'ē dendu'ū chí chó'oo ndúúcu yú. Ní nguéé i'teenu yú tanducuéⁿ'ē dendu'ū chí n'giindiveeⁿ yú chí 'iiⁿ'yāⁿ ngaⁿ'a yeⁿ'e táámá 'iiⁿ'yāⁿ yeⁿ'e chí nguéé n'daacā idiíⁿ yā. Ní cunee yíínu yú nducuéⁿ'e chí n'daacā. Ní cucheē yú yeⁿ'ē tanducuéⁿ'ē dendu'ū chí diítu n'dái taachí chó'oo yeⁿ'ē yú.

⁸Nduuti chí s'uuúⁿ neⁿ'e yú nducyaaca 'iiⁿ'yāⁿ, tuu'mi ní 'áámá canee yú ndúúćū vaadi neⁿ'e yeⁿ'é Dendyuūs chí 'áámá cūneē ndúúcu yú. Ndaā tiempo chí profetas chí ngaⁿ'a nduudu yeⁿ'é Dendyuūs 'āā ntéé caaⁿ'maⁿ yā 'tíicā. Ní 'iiⁿ'yāⁿ chí ngaⁿ'a yā n'deeē 'nááⁿ davaacu 'āā ntéé caaⁿ'maⁿ yā 'tíicā. Ní vaadi déenū ntúūⁿ chí 'iiⁿ'yāⁿ ngaⁿ'a ní cho'oo yéⁿ'ē. Dámaāⁿ canee vaadi neⁿ'e. ⁹Maaⁿ ní caaⁿ'maⁿ yú nduudu yeⁿ'é Dendyuūs tan'dúúćā chí n'giⁿ'í yā s'uuúⁿ naati Ndyuūs nguéé ch'iⁿ'í yā s'uuúⁿ vaadi déenū yeⁿ'ē tanducuéⁿ'ē. ¹⁰Taachi chó'oo tanducuéⁿ'ē dendu'ū chí canéē chí cuchii tuu'mi ní deenu yú nducuéⁿ'ē, nguéé dámaāⁿ 'téé nūūⁿ.

¹¹Taachí saⁿ'a 'lííⁿ 'úú, ngaⁿ'a tan'dúúćā chí ngaⁿ'ā da'cáiyāa ní nadacadíinúúⁿ tan'duucā da'cáiyāa.

Taachí chi ch'εεte 'úú 'āā ntéé dífⁿ tan'dúúcā da'cáiyāa. ¹²Maaⁿ ní inaaⁿ yú tanducuéⁿē tan'dúúcā chi inaaⁿ yú chεeti 'áámá espejo yaāⁿ yáāiⁿ, ní nguéeⁿ inaaⁿ yú n'daacā. Cuayiivi miiⁿ ní n'diichi yú 'iivú Señor Jesucristo dánaaⁿ dánaaⁿ yú. Maaⁿ ní 'téé nuúⁿ deenu yú. Cuayiivi miiⁿ ní snaaⁿ yú tan'dúúcā 'iivu Señor Jesucristo n'diichí yā s'uuúⁿ. 'Tíicā snaaⁿ yú. ¹³Ná vida yeⁿe s'uuúⁿ véé 'iinū chi n'daacā. Véé chi i'teenu yú Dendyuūs, ní véé chi canee ngiinu yú chi diiⁿ Dendyuūs ndúúcu yú, ní véé chi neⁿe yú Dendyuūs. Nduu 'iinú naaⁿ chuū ní chiiⁿ chi ch'εεté n'dai, ní chífⁿ chi neⁿe yú 'iivú Dendyuūs ní neⁿe yú nducyaaca 'iiⁿyāⁿ.

Yeⁿe chi 'iiⁿyāⁿ ngaⁿa
yā táámá davaacu

14 Nducuéⁿē chi diiⁿ yú canéé chi diiⁿ yú chi n'daacā, ti neⁿe yú nducyaaca 'iiⁿyāⁿ. Véé ntiiⁿnyuⁿ ch'εεte yeⁿé Ndyuūs. Ntiiⁿnyuⁿ miiⁿ chuū chi vmnááⁿ vmnaaⁿ chi ndís'tiī cuuvi neⁿé ní chi dífⁿ nī. Chífⁿ chí caaⁿmáⁿ nī nduudu cuaacu chi Ndyuūs ch'iⁿí yā ndís'tiī. ²'Áámá hermano yeⁿe yú chi ngaⁿa táámá davaacu chi n'dááⁿ chi nguéeⁿ deēnū yú, hermano miiⁿ nguéeⁿ ngaⁿa sa ndúúcu 'iiⁿyāⁿ ti ngaⁿa sa ndúúcu Ndyuūs. S'uuúⁿ nguεε n'giindiveeⁿ yú nduudu miiⁿ, naati Ndyuūs n'giindiveeⁿ yā, ní hermano miiⁿ ngaⁿa sa yeⁿe espíritu yeⁿē maaⁿ sa. ³Iiⁿyāⁿ chi ngaⁿa yā nduudu yeⁿé Ndyuūs na veedi dífⁿ yā chi hermanos chi i'téenu cá yā Ndyuūs. Ní ca'cueeⁿ yā hermanos. Ní cá'a yā

'viich'εεtínnūⁿ hermanos. ⁴Iiⁿyāⁿ chi ngaⁿá yā nduudu chi n'dááⁿ chi nguéeⁿ deenú tanáⁿā 'iiⁿyāⁿ, 'iiⁿyāⁿ miiⁿ ngi'cueeⁿ maáⁿ yā. Ní 'iiⁿyāⁿ chi candéē nduudu yeⁿé Ndyuūs chi n'giindiveeⁿ tanáⁿa yā, 'iiⁿyāⁿ miiⁿ ngi'cueeⁿ yā tanáⁿa yā chi snúūⁿ yaācū.

⁵Neⁿé chi nducyaaca ndís'tiī cuuvi caaⁿmáⁿ nī tanáⁿā davaacu chi n'dááⁿ naati n'daacā ca chi caaⁿmáⁿ nī nduudu yeⁿé Ndyuūs na veedi ní n'giindiveeⁿ yā 'iiⁿyāⁿ. 'Iiⁿyāⁿ chi ngaⁿá yā tanáⁿa davaacu chi n'dááⁿ chi nguéeⁿ deenu yú, 'iiⁿyāⁿ s'eeⁿ nguéeⁿ ca'cueeⁿ yā s'uuúⁿ. Dámaāⁿ n'giindiveeⁿ yú nduuti chi táámá yā caaⁿmáⁿ yā de'ε neⁿē caaⁿmaⁿ nduudu miiⁿ. ⁶Ndís'tiī hermanos yeⁿé, ndúúti chi 'úú ndaaⁿ ní caaⁿmáⁿ ndúúcu táámá davaacu chi n'dááⁿ chi nguéeⁿ n'giindiveeⁿ nī, ítáácā cuuvi cunneé ndís'tiī? Naati nduuti chi caaⁿmáⁿ na veedi tuu'mi ní cuuví caaⁿmáⁿ yeⁿē cosas chi cuchii, o yeⁿē nduudu cuaacu chí n'dai chí yeⁿé Ndyuūs. Tuu'mi ní cuuvi 'cuεetinée nī tan'dúúcā chi ngaⁿá nduudu yeⁿé Ndyuūs, ní ca'cueeⁿ ndís'tiī.

⁷Taachí 'iiⁿyāⁿ itii'ví yā 'áámá flauta, o tuu'ví yā 'áámá guitarra, ní nguéeⁿ n'daaⁿ tono chi itii'ví yā, o tuu'ví yā tuu'mi ní ítáácā cuuvi deenú tanáⁿā 'iiⁿyāⁿ de'ε música chi itii'ví yā o tuu'ví yā? ⁸Nduuti chi 'áámá soldado itii'ví yā trompeta yeⁿe música yeⁿe caanda, ní nguεε n'daaⁿ tono chi itii'ví yā, ítáácā cuuvi deenú tanáⁿā soldados ní cuundiyaáⁿ yā chi 'āā ndaaⁿ caandaá? ⁹Tiicá ntúūⁿ. Nduuti chi ndís'tiī ní caaⁿmaⁿ nī ndúúcu

nduudu chi nguée deenu tanáⁿa yā
 ɛ́tááɛ tuumicadiinúⁿ yā chi ngaⁿá
 nĩ? Ndís'tiĩ ní dííⁿ nĩ tan'dúúɛ chi
 ngaⁿá nĩ na 'yúúné. ¹⁰Nééne n'dee
 'nááⁿ davaacu véé iⁿ'yeeⁿdí' cūū. Ní
 'iⁿ'yāⁿ cuuvi caaⁿ'máⁿ yā maaⁿ na
 nduudu yeⁿe yā nducueⁿé chi neⁿé
 yā ní tanáⁿá 'iⁿ'yāⁿ s'eeⁿ 'caandiveéⁿ
 yā nduudu yeⁿe yā. ¹¹Nduuti chi
 'úú nguɛɛ n'giindiveéⁿ nduudu yeⁿe
 tanáⁿá 'iⁿ'yāⁿ tuu'mi ní 'iⁿ'yāⁿ miiⁿ
 canée yā tan'dúúɛ áámá 'iⁿ'yāⁿ chi
 canúúⁿ yúúní. 'Tííca ntúuⁿ, 'úú ní
 caneé tan'dúúɛ áámá 'iⁿ'yāⁿ chi
 canúúⁿ yúúní ti nguée n'giindiveéⁿ
 yā nduudu yeⁿé. ¹²Ndís'tiĩ chi neⁿé
 nĩ dííⁿ nĩ ntiⁿ'nyuⁿ ch'ɛete yeⁿé
 Ndyuūs, ngiicá nĩ Espíritu N'dai
 yeⁿé Ndyuūs chi téé yā ntiⁿ'nyuⁿ
 ndís'tiĩ, ntiⁿ'nyuⁿ chi cuuví ca'cuéeⁿ
 nĩ nduudu yeⁿé Ndyuūs 'iⁿ'yāⁿ. Ní
 'íícú 'iⁿ'yāⁿ cuuvi déénu ca yā yeⁿe
 Ndyuūs.

¹³'iⁿ'yāⁿ mífíⁿ chi caaⁿ'maⁿ yā
 táámá davaacu chi n'dááⁿ canée
 chi ngiicá yā Ndyuūs de'e chi
 neⁿé caaⁿ'maⁿ nduudu chí caⁿ'a
 yā. Ní cuuvi caaⁿ'máⁿ yā tanáⁿa
 yā nduudú miiⁿ. ¹⁴Nduuti chi 'úú
 caaⁿ'máⁿngua'á ndúúɛ táámá
 davaacu chi n'dááⁿ ní nguée deenú
 chííⁿ chí caaⁿ'máⁿ tuu'mi ní dámaaⁿ
 espíritu yeⁿé caaⁿ'maⁿ. Ní 'úú ní
 nguée tuumicadiinúⁿ d'ɛ'ɛ vɛɛ
 chi caaⁿ'máⁿ. ¹⁵ɛ'Dɛ'ɛ dííⁿ tuu'mi?
 Caaⁿ'maⁿngua'á ndúúɛ nduudu
 na veedi ní espíritu yeⁿé ní
 túúmíɛadiinúⁿ chííⁿ chi dííⁿ. Ní
 caatá ndúúɛ nduudu na veedi ní
 espíritu yeⁿé ní túúmíɛadiinúⁿ
 chííⁿ chi caatá dendu'ú. ¹⁶Ndúúti
 chi ndís'tiĩ caaⁿ'maⁿngua'á nĩ
 ndúúɛ táámá davaacu chi n'dááⁿ

ní ngaⁿá nĩ 'tííɛ: N'dií Ndyuūs,
 gracias, ní dííⁿ nĩ ndúúɛ espíritu
 yeⁿé nĩ, tuu'mi ní ɛ́tááɛ cuuvi
 caaⁿ'maⁿ tanáⁿa yā chi 'tííɛ chííⁿ
 chi ngaⁿá nĩ? ¹⁷Áará chí n'daacā
 ngaⁿá nĩ, nguée cunnee nĩ 'iⁿ'yāⁿ
 chi caⁿ'á yā yaācū. ¹⁸Úú Pablo
 nca'á gracias Ndyuūs yeⁿe yú chi
 ngaⁿá cá n'dee 'nááⁿ davaacu chi
 n'dááⁿ ndúúɛ espíritu yeⁿé nguɛɛ
 ti ndís'tiĩ. ¹⁹Taachí ngaⁿá na yaācū
 n'daacā ca chí caaⁿ'máⁿ nyu'u
 nduudu na veedi chi 'úú cadiinúⁿ
 ní 'iicu ca'cueéⁿ tanáⁿa yā, ti 'úú
 ngaⁿá ta ndiichi mil nduudu táámá
 naaⁿ davaacu chi n'dááⁿ chi nguée
 itúúmíɛadiinuuⁿ tanáⁿa yā.

²⁰Ndís'tiĩ hermanos yeⁿé, nguée
 nadacadíinuuⁿ nĩ tan'dúúɛ
 dá'caiyaā, o tan'dúúɛ áámá
 da'cuá'aa chi nguée inadacadíinuuⁿ
 yā yeⁿé nuuⁿndi yeⁿe yā 'tííɛ nĩ.
 Maaⁿ ní nducueⁿé chi dííⁿ nĩ ní
 nadacadíinuuⁿ nĩ yeⁿé tan'dúúɛ
 saⁿā n'geete nadacadíinuuⁿ sa.
²¹Canée nguūⁿ na libro yeⁿé
 Ndyuūs ndii cuááⁿ vmnaaⁿ 'tííɛ:
 'Úú chi 'iivú Ndyuūs ngaⁿá chuū.
 'Úú dicho'ó 'iⁿ'yāⁿ chi canúúⁿ yúúní
 chi ngaⁿá yā nduudu cuaacu yeⁿé
 ndúúɛ táámá naaⁿ davaacu. Ndaa
 yā nanááⁿ 'iⁿ'yāⁿ s'eeⁿ ní 'iⁿ'yāⁿ
 s'eeⁿ nguée neⁿé yā 'caandiveéⁿ yā
 nduudu yeⁿé. 'Tííɛ ngaⁿá Ndyuūs.
²²Cáávā chííⁿ ní Ndyuūs ca'á yā
 poder 'iⁿ'yāⁿ chi caaⁿ'máⁿ yā n'dee
 'naaⁿ davaacu chi 'iⁿ'yāⁿ nguée
 tuumicadíinuuⁿ yā. Ní chííⁿ chí
 n'giⁿ'i Ndyuūs ní 'aama seña chi
 poder yeⁿe yā cááva 'iⁿ'yāⁿ chi
 nguée i'téenu yā Ndyuūs. Nguée
 caavā s'uuúⁿ chi i'téenu yú. 'iⁿ'yāⁿ
 chi ca'cueéⁿ yā nduudu yeⁿé

Ndyuūs ní ngaⁿa yā cáāvā s'uuúⁿ chi i'teenu yú nguéé ti cáāvā 'iⁿyāⁿ chi nguéé i'téenu yā Dendyuūs yeⁿē yú. ²³Ndúúti chi 'iⁿyāⁿ chi nguéé i'téenu yā 'iivú Ndyuūs, o 'iⁿyāⁿ chi canúúⁿ yúúni, ndaa yā na yáacū ní nduuvidaamá yā ndúúcu yú ní nducyaaca yú ngaⁿa yú davaacu chí ñ'dááⁿ. ¿Áá nguéé caaⁿmáⁿ yā chi s'uuúⁿ ní loco yú? ²⁴Ndúúti chi nducyaaca nī ca'cueeⁿ nī nduudu yeⁿé Ndyuūs na veedi ní ndaa 'áámá 'iⁿyāⁿ chēeti yaācū, 'iⁿyāⁿ chi nguéé i'téenu yā 'iivú Ndyuūs o nguéé déenu yā 'iivú Ndyuūs yeⁿē yú, tuu'mi ní 'iⁿyāⁿ miⁿ cuuvi dííⁿ yā sentir nuuⁿndi yeⁿé yā. Ní nadacadiinúúⁿ yā yeⁿē nuuⁿndi yeⁿé yā na staava yeⁿé yā. ²⁵Iⁿyāⁿ miⁿ ní cuuvi deenu yā de'ē chi maáⁿ yā nadacadiinúúⁿ yā na staava yeⁿe yā chi nguēe cuuvi n'diichí yā. Ní 'iⁿyāⁿ miⁿ cundiitín'díí yā ní cu'téenu yā Ndyuūs. Ní ngaⁿá yā 'tiicā: Cuaacu níⁿnyúⁿ Ndyuūs caneé yā ndúúcu ndís'tii.

**Diiⁿ n'daacá nī tanducuéⁿe
ndúúcu orden**

²⁶Ndís'tii ní 'tíicā dííⁿ nī taachi nduuvidáámá nī. Naⁿa ndís'tii ní candée nī 'aama canción. Ní naⁿa nī ch'eeⁿnee listo nī chi ca'cueeⁿ nī tanáⁿa yā. Naⁿá nī ní ch'eeⁿnee listo nī chi caaⁿmáⁿ nī 'áámá nduudu cuaacu yeⁿé Ndyuūs. Naⁿá nī ní caaⁿmáⁿ nī táámá naaⁿ davaacu chí ñ'dááⁿ naati n'nuúⁿ nī vmnaaⁿ vmnaaⁿ 'áámá hermano chi cuuvi caaⁿmáⁿ de'ē chi neⁿe caaⁿmaⁿ nduudu s'eeⁿ chí ñ'dááⁿ. 'Tíicā cuuvi, ní cu'téenu cá nī yeⁿē 'iivú Ndyuūs. ²⁷Damaāⁿ 'uuví o

'iinú nī 'aama 'aamá nī caaⁿmáⁿ nī ndúúcu naaⁿ davaacu, nduudú chí ñ'dááⁿ, naatí táámá nī ch'eeⁿnee listo chi caaⁿmáⁿ nī de'ē neⁿe caaⁿmāⁿ nduudu s'eeⁿ chí ñ'dááⁿ. ²⁸Nduuti chi nguéé véé 'áámá yā nguaaⁿ ndís'tii chí cuuvi caaⁿmaⁿ de'ē neⁿe caaⁿmāⁿ nduudu s'eeⁿ chí ñ'dááⁿ tuu'mi 'iⁿyāⁿ nguéé cuuvi caaⁿmáⁿ yā ndúúcu davaacu chí ñ'dááⁿ naachi nduuvidaamá nī. Naati 'iⁿyāⁿ miⁿ cuuvi ndeé yā cúūnū cúūnū ndúúcu Dendyuūs ndúúcu davaacu chí ñ'dááⁿ.

²⁹Taachí nduuvidaamá nī, 'uuví nī o 'iinu nī candée nī nduudu cuaacu yeⁿé Ndyuūs ní ca'aama ca'aama nī caaⁿmáⁿ nī nduudu na veedi ní tanaⁿá yā nadacadínuuⁿ yā yeⁿe nduudu chí ngaⁿa nī. ³⁰Ní nduuti Ndyuūs ní n'giⁿi yā 'áámá ndís'tii chí véé nī 'áámá nduudu yeⁿé yā chí caaⁿmáⁿ nī, tuu'mi ní 'iⁿyāⁿ chí candée yā nduudu miⁿ canéé chí téé yā lugar chí caaⁿmáⁿ nī nduudu yeⁿé Ndyuūs. ³¹'Tíicā nducyaaca nī cuuvi caaⁿmáⁿ nī nduudu yeⁿé Ndyuūs ca'áámá ca'áámá nī. Tanáⁿa nī n'giindiveéⁿ nī. Ní 'tíicā ní cuuvi déenu cá nī yeⁿé Ndyuūs ní cu'téenu cá nī yeⁿé yā. ³²Iⁿyāⁿ chí caaⁿmáⁿ yā nduudu yeⁿé Ndyuūs deenu yā de'ē tiempo chí caaⁿmáⁿ yā. ³³Ndyuūs neⁿe yā chí véé orden chēeti yaācū yeⁿé yā ní véé vaadi 'diiⁿ. 'Tíicā ní ch'eeⁿnéé 'dííⁿ nī dendu'ū na staava yeⁿé nī. 'Tíicā cānee tanducuéⁿē yaācū yeⁿé Ndyuūs. ³⁴Taachi nduuvidáámá nī n'daataa nguéé cuuvi candēe tá nduudu yeⁿe Dendyuūs, naati 'diiⁿ 'dííⁿ nuuⁿ 'cuētinéé cheendí tá. 'Tíicā canéé nguūⁿ na ley

yeⁿé Ndyuūs. ³⁵Nduuti chi 'áamá n'daataá nguée tuumicadínuuⁿ tá yeⁿe nducuéⁿē chi ngaⁿa yā cheeti yaācū, tuuⁿmi taachi ndaa tá ná vaacu tá cuuvi nítínguuneeⁿ ta isaⁿā yeⁿe tá. Nduuti chi 'áama n'daataá candēē tá nduudu yeⁿé Ndyuūs cheeti yaācū, tuuⁿmi 'cuináaⁿ tá.

³⁶¿Áá nguée neⁿé nī 'caandiveeⁿ nī chi dinguúⁿ yeⁿe nī? ¿Dē'ē ra tuuⁿmi? ¿Áá yeⁿe ndís'tiī nduudu yeⁿe Ndyuūs o ndaā dāmáāaⁿ nanááⁿ ndís'tiī nduudu miiⁿ?

³⁷Nduuti chi 'áamá saⁿā nguaaⁿ ndís'tiī nadacadínuuⁿ sa chi cuaacu chi ntiiⁿnyuⁿ yeⁿē sa chiiⁿ chi caaⁿmaⁿ sa nduudu cuaacu yeⁿé Ndyuūs, ní Espíritu N'dai yeⁿé Ndyuūs ca'cueéⁿ yā saⁿa miiⁿ, tuuⁿmi ní cuuvi deenu sa chííⁿ chi idinguúⁿ tan'dúucā chi Ndyuūs chííⁿ yā 'úú. ³⁸Nduuti chi saⁿā miiⁿ nguée 'caandiveeⁿ sa nduudu yeⁿé, tuuⁿmi ní ndís'tiī nguée 'caandiveeⁿ nī nduudu yeⁿē sa.

³⁹Tíicā dííⁿ nī, ndís'tiī hermanos yeⁿé. Caaⁿmánⁿ nī nduudu cuaacu ní ca'á nī lugar chi 'iiⁿyāⁿ caaⁿmánⁿ yā táámá davaacu chi n'dááⁿ. ⁴⁰Diíⁿ n'daacá nī tanducuéⁿē ndúúcū orden.

Jesucristo 'āā nnduuchi yā yeⁿē nguaaⁿ tináⁿā

15 Ndís'tiī hermanos yeⁿé, maaⁿ ní chuū ngaⁿa cuaācū ngíí ndís'tiī nduudu yeⁿe evangelio chi ndúúdú ngai yeⁿē Jesucristo. Chííⁿ 'āā ngaⁿá, ní ngi'cueeⁿ ndís'tiī. Ní ndís'tiī ní ngiindiveeⁿ nī ní s'téenu nī. Ní 'aama canee n'daacá nī ná nduudu 'cūū. ²Cáávā nduudu

cuaacu yeⁿé Dendyuūs ndís'tiī ní nnguáⁿai nī yeⁿé nuuⁿndi yeⁿé nī nduuti chi 'áamá cānee na staava yeⁿé nī chííⁿ chi ca'cueeⁿ ndís'tiī. Nduuti chi ndís'tiī nguée i'teenú nī nguée dichíí'vē nduudu miiⁿ cáávā ndís'tiī.

³Vmnááⁿ vmnaaⁿ ní chí'cueeⁿ ndís'tiī chee chi más ca importante tan'dúucā chi Cristo chí'cueeⁿ yā 'úú. Chuū chiiⁿ chi Cristo ní chííⁿ yā cáávā nuuⁿndi yeⁿē yú tan'dúucā chi canée nguūⁿ ndii cuááⁿ vmnaaⁿ na libro yeⁿé Ndyuūs. ⁴Iiⁿyāⁿ ní chí'ichi yā Cristo ní cho'ōo ndii 'íínú nguuví ní Dendyuūs nadin'duuchí yā Cristo yeⁿe nguaaⁿ tináⁿā tan'dúucā chi canée nguūⁿ na libro yeⁿé Dendyuūs. ⁵Guayiivi chi Cristo nduuchi yā yeⁿe nguaaⁿ tináⁿā saⁿā Pedro n'diichi sá Cristo. Guayiivi chí cho'ōo chuū ní ndichuuví apóstoles n'diichí yā Cristo.

⁶Guayiivi miiⁿ ní 'áamá tiempo nūuⁿ nyuⁿu ciento hermanos nduuvidaamá yā ní n'diichí yā Cristo chí 'āā nduuchi yā yeⁿē nguaaⁿ tináⁿā. N'dee cá yā yeⁿe nyuⁿu ciento hermanos sндуuchí yā ndíí maaⁿ, naati duu'ví yā n'dii yā. ⁷Guayiivi miiⁿ ní Jacobo, apóstol chí ndēē nduudu yeⁿé Dendyuūs n'diichi ntúuⁿ yā Cristo. Ní guayiivi ní nducyaaca apóstoles n'diichí yā Cristo.

⁸Cho'ōo 'yááⁿ n'dai nguuví ní 'úú, Pablo, n'diichi ntúúⁿ Cristo, 'áará chí 'úú nguée intiinaáⁿ Cristo taachi cánée yā iⁿ'yeeⁿdí 'cūū. ⁹'Úú, Pablo, nacadiinúúⁿ chí 'úú nguée n'daacā 'úú, tan'dúucā yeⁿe tanáⁿā apóstoles chí candēē yā nduudu yeⁿé Ndyuūs. 'Úú nguée cánée chí cuuví apóstol

ti vmnááⁿ vmnaaⁿ can'daá 'ii'yāⁿ yeⁿe yaācū yeⁿ'é Dendyuūs, ti neⁿ'é chi 'ii'ntyéⁿ'ē ca'á yā orden chi 'caaⁿ'núⁿ yā 'ii'yāⁿ chi naⁿ'á yā yaacū yeⁿ'é Ndyuūs. ¹⁰Maaⁿ ní 'úú 'aama apóstol 'úú ti Ndyuūs dííⁿ yā n'daacā n'dai nduucú. Caati Ndyuūs dííⁿ yā n'daacā n'dai nduucú maaⁿ ní 'úú idííⁿ ntiiⁿnyuⁿ yeⁿ'é yā. Ní chííⁿ chi Ndyuūs dííⁿ yā nduucú dichíí'vē. Nguéé dāmaāⁿ 'úú chi diiⁿ ca ntiiⁿnyuⁿ yeⁿ'é yā ti Ndyuūs. Ndyuūs chi dííⁿ yā n'daacā n'dai nduucú ní canée yā nduucú ní nginneē yā 'úú. ¹¹Nguéé dē'ē vee ndii nduuti chi 'úú o náⁿ'a yā chi candee nduudu yeⁿ'é Ndyuūs, tí nús'ūū ngaⁿ'a n'ū nduudu miíⁿ. Ní ndís'tii ní i'téenu nī nduudu miíⁿ.

**'Ii'yāⁿ caⁿ'á yā nnduuchi
yā yeⁿ'ē nguaaⁿ tináⁿ'ā**

¹²Ndís'tii ní i'téenu nī chí ngaⁿ'a n'ū chi Cristo nduuchi yā yeⁿ'ē nguaaⁿ tináⁿ'ā. ¿Táacā cuuvi chí ngaⁿ'á nī chi nguéeⁿ nnduuchi 'ii'yāⁿ s'eeⁿ yeⁿ'ē nguaaⁿ tináⁿ'ā? ¹³Nduuti chi nguéeⁿ nnduuchi 'ii'yāⁿ s'eeⁿ yeⁿ'ē nguaaⁿ tináⁿ'ā Cristo ntúūⁿ ní nguéeⁿ 'āā nduuchi yā yeⁿ'ē nguaaⁿ tináⁿ'ā. Ní cuerpo yeⁿ'e Cristo canee na yáinyāⁿ ndíí maaⁿ. ¹⁴Ndúúti chi Cristo nguéeⁿ 'āā nduuchi yā yeⁿ'e nguaaⁿ tináⁿ'ā tuu'mi ní nduudu chi ngaⁿ'á n'ū nguéeⁿ dichíí'vē. 'Tiicá ntúūⁿ nguéeⁿ dichíí'vē chiiⁿ chi i'téenu n'ū yeⁿ'e Cristo. ¹⁵'Tiicá ntúūⁿ chiiⁿ chi ngaⁿ'á n'ū chi nduudu cuaacu yeⁿ'é Ndyuūs, tuu'mi ní nduudu yaadi nduuti chi nguéeⁿ 'tíicā. Naati ngaⁿ'a cuaacú n'ū chi Ndyuūs dííⁿ yā chí 'āā nduuchi Cristo yeⁿ'ē nguaaⁿ tináⁿ'ā. Nduuti

chi nguéeⁿ nnduuchi tanáⁿ'ā 'ii'yāⁿ yeⁿ'ē nguaaⁿ tináⁿ'ā 'tiicá ntúūⁿ nguéeⁿ 'āā nduuchi Ndyuūs Cristo yeⁿ'ē nguaaⁿ tinaⁿ'ā. ¹⁶Ndúúti chi tanáⁿ'a 'ii'yāⁿ nguéeⁿ nnduuchi yā yeⁿ'ē nguaaⁿ tináⁿ'ā, 'tiica ntúūⁿ, Cristo nguéeⁿ 'āā nduuchi yā yeⁿ'ē nguaaⁿ tináⁿ'ā. ¹⁷Nduuti chi Cristo nguéeⁿ 'āā nduuchi yā yeⁿ'ē nguaaⁿ tináⁿ'ā nguéeⁿ dichíí'vē chi i'téenu yú Ndyuūs. Ní s'uuúⁿ canee yú condenado ndúúcu nuuⁿndi yeⁿ'ē yú. ¹⁸Nduuti chi 'tíicā, tuu'mi ní 'ii'yāⁿ chí 'āā i'téenu yā Cristo, ní maaⁿ ní 'āā n'dii yā, 'āā chindái yā ndúúcu nuuⁿndi yeⁿ'é yā. ¹⁹Nduuti chi nguéeⁿ nduuchi Cristo yeⁿ'ē nguaaⁿ tináⁿ'ā tuu'mi ní s'uuúⁿ chí i'teenu yú Cristo, núúⁿmáⁿ neⁿ'e chí snée yú na iⁿ'yeeⁿdí cūū neenē ndaachi yínu yú nguéeⁿ ti tanáⁿ'ā 'ii'yāⁿ.

²⁰Naati cuaacu chí Cristo miíⁿ 'āā nduuchi yā yeⁿ'e nguaaⁿ tináⁿ'ā. Ní Cristo miíⁿ ní 'ii'yāⁿ vmnááⁿ vmnaaⁿ chí nduuchi yā yeⁿ'e nguaaⁿ tináⁿ'a yeⁿ'ē nducyáacá 'ii'yāⁿ chí n'díí. ²¹Ti cáāvā nuuⁿndi yeⁿ'e 'áámá saⁿ'a Adán, canée chí nducyaaca yú 'cuūvi yú. Ní cáāvā chí diiⁿ 'aama saⁿ'ā Cristo mífⁿ, canée chí nduuchi yú yeⁿ'ē nguaaⁿ tináⁿ'ā. ²²S'uuúⁿ ní yeⁿ'e Adán chí diiⁿ nuuⁿndi sa. S'uuúⁿ ní 'ii'yāⁿ chí diiⁿ nuuⁿndi s'uuúⁿ. Taachí 'ii'yāⁿ diiⁿ nuuⁿndi yā tuu'mi canee chí 'cuūvi yā. S'uuúⁿ ní yeⁿ'e Cristo s'uuúⁿ ní 'cuæti nduuchi yú. ²³Ti 'áámá 'áámá 'ii'yāⁿ caⁿ'á yā nnduuchi yā yeⁿ'e nguaaⁿ tináⁿ'ā tan'dúúca chí itunéeⁿ 'ii'yāⁿ. Cristo 'āā nduuchi yā vmnááⁿ vmnaaⁿ yeⁿ'e nguaaⁿ tináⁿ'ā. Ní cuayiivi taachi ndaá Cristo na iⁿ'yeeⁿdí cūū taama

vmnéⁿēe, tuu'mi ní 'iⁿyāⁿ chi n'díí chi yeⁿe Cristo, 'iⁿyāⁿ s'eeⁿ ní caⁿá yā nduuchi yā yeⁿe nguaaⁿ tináⁿā. ²⁴Tuu'mi ní ndaā nguuví chi 'cuiinū iⁿyeeⁿdí 'cūū cuayiivi taachi chó'oo tanducuéⁿē chi Dendyuūs Chiida yú neⁿé yā chi chó'oo. Ní Cristo caaⁿmaⁿ ntiiⁿnyúⁿ yā yeⁿe nducyaaca 'iⁿyāⁿ ndíí tiiⁿ yeⁿe iⁿyeeⁿdí 'cūū ndúúⁿcū poder yeⁿe. Tuu'mi ní Cristo ncaⁿá yā Chiidá yā tanducuéⁿē chi yeⁿe chi ngaⁿa ntiiⁿnyúⁿ yā. ²⁵Ti maaⁿ ní Cristo miiⁿ canée yā tan'dúúⁿcā 'áámá Rey. Ní taachi chí cuchée yā yeⁿe tanducuéⁿē enemigo yeⁿe yā, tuu'mi ní enemigos yeⁿé yā canée yā tan'dúúⁿcā chi canée yā mááⁿ ca'a Cristo; ²⁶tuu'mi ní chi 'cuiinu enemigo yeⁿe Cristo chi vaadí n'gii. Ní Cristo chichē yā yeⁿe. ²⁷Dendyuūs 'āā ca'a yā nducuéⁿē dendu'u na ta'ā Cristo ní Cristo ngaⁿa ntiiⁿnyúⁿ yā yeⁿe tanducuéⁿē. Ní nducuéⁿē canee tan'dúúⁿcā chi canee maaⁿ ca'a Cristo. Cristo miiⁿ nguéeⁿ ngaⁿa ntiiⁿnyúⁿ yā yeⁿe Chiidá yā naati Chiidá yā 'āā ca'a yā Cristo tanducuéⁿē. ²⁸Taachí Cristo chēé yā yeⁿe tanducuéⁿē, tuu'mi ní Cristo, chi daiya Dendyuūs, ca'a yā nducuéⁿē na ca'a Dendyuūs chi Chiidá yā. Ní Cristo miiⁿ maáⁿ yā canee yā maaⁿ poder yeⁿe Chiidá yā.

²⁹¿De'e rá tuu'mi? Nduuti chi nguéeⁿ nduuchi 'iⁿyāⁿ s'eeⁿ yeⁿe nguaaⁿ tináⁿā, ¿de'e cúúví chi dííⁿ yā 'iⁿyāⁿ chi ndéédínuūⁿniⁿ yā cáávā tanáⁿā 'iⁿyāⁿ s'eeⁿ chi n'dii? ¿De'e cáávā idííⁿ yā 'tíicā? Nduuti chi nguéeⁿ i'téenu yā chi 'iⁿyāⁿ chi n'dii caⁿá yā nduuchi yā yeⁿe nguaaⁿ tináⁿā.

³⁰Tiicá dendu'ū. ¿De'e cúúví chí 'úú cuneé ndúúⁿcū cáándá chi 'iⁿyāⁿ 'caaⁿnúⁿ yā 'úú ndii hora miiⁿ?

³¹Cuáácú chi nguuví nguuví 'iⁿyāⁿ neⁿe 'caaⁿnúⁿ yā 'úú cucáávā chi i'teenú Cristo. Cuáácú chi yeenú, ti cáávā Señor Jesucristo chí Señor yeⁿe yú ndís'tii i'téenu nī Jesucristo ti 'úú ngaⁿá nduudu cuaacu yeⁿe Jesucristo nanááⁿ ndis'tii. ³²¿De'e chí cuuvi yeⁿé chí cuhéé yeⁿé 'iⁿyāⁿ yááⁿ Efeso chí dííⁿ yā nduucú tan'dúúⁿcā 'iiti taaⁿ nduuti chí nguéeⁿ nduuchi 'iⁿyāⁿ s'eeⁿ yeⁿe nguaaⁿ tináⁿā? Tuu'mi ní ngaⁿa yú 'tiicā: Che'e yú vaa, cu'u yú vaa, ti cavyaaⁿ ní 'cuūví yú.

³³Nguéeⁿ dííⁿ nī chí 'iⁿyāⁿ canche'éeⁿ yā ndís'tii. Nduuti chí caⁿá nī ndúúⁿcū 'iⁿyāⁿ chí nguéeⁿ n'daacā idiíⁿ yā tuu'mi ndís'tii cuuví dííⁿ nī tan'dúúⁿcā chí idiíⁿ 'iⁿyāⁿ s'eeⁿ. Nguéeⁿ n'daacā chí dííⁿ nī 'tííca. ³⁴Nadacadíínuuⁿ nī chēé chí dííⁿ nī. Ní dííⁿ nī cosa chí n'daacā. Ní nguéeⁿ dinuuⁿndí nī. Tanáⁿā 'iⁿyāⁿ nguéeⁿ deenú yā yeⁿe Dendyuūs. Chuū ní ngaⁿá yeⁿe ndís'tii ní cuuví 'cuinááⁿ nī.

Yeⁿe tan'dúúⁿcā chí 'iⁿyāⁿ caⁿá yā nduuchi yā yeⁿe nguaaⁿ tináⁿā

³⁵Nduu'ví 'iⁿyāⁿ ní cuuvi caaⁿmaⁿ yā chuu. ¿Táácā chí 'iⁿyāⁿ chí 'āā tináⁿā chí nnduuchi yā yeⁿe nguaaⁿ tináⁿā? Ní vee cuerpo ngai yeⁿé 'iⁿyāⁿ s'eeⁿ, ¿táácā canée? ³⁶Ndís'tii chí ngaⁿa nī 'túúⁿcā nguéeⁿ nadacadíínuuⁿ nī yeⁿe chí ngaⁿa nī. Ndís'tii chí ngiinu nī ndaata deenú nī chí ndaata miiⁿ canée chí n'dii vmnááⁿ vmnaaⁿ chí dichíí'vē ní ndēé n'gui'í yeⁿe. ³⁷Ndaata

miiⁿ chi ndís'tiī ngiīnu nī. ¿Áá nguée tan'dúúca 'áámá planta chi cuchiī, nduuti chi trigo, o nduuti chi niⁿnuⁿ, o dē'ē vee ndaata chi vée? ³⁸Dendyuūs díⁿ yā chi 'cuiita ca'áámá ca'áámá ndaata miiⁿ tan'dúúca chi neⁿe yā, ni 'āā vi'í cā ca'áámá ca'áámá yaata naaⁿ yeⁿe ndaata miiⁿ. ³⁹Tíicá ntúūⁿ na iⁿ'yeeⁿdí 'cūū. Nguēē dáámá cuerpo yeⁿe 'iiⁿ'yāⁿ. 'Āā vi'í caā cuerpo yeⁿe 'iiti, 'āā vi'í caā cuerpo yeⁿe 'yáádá, ní 'āā vi'í caā cuerpo yeⁿe 'yáacā. ⁴⁰Vée cuerpo yeⁿe cosa s'eeⁿ chi vée nanguuvi. Ní vée cuerpo yeⁿe 'iiⁿ'yāⁿ chi canée na iⁿ'yeeⁿdí 'cūū. Ní cuerpo yeⁿe cosa chi vée nanguuvi ní dēve. Ní 'aa vi'í caā cuerpo chi ndēve yeⁿe 'iiⁿ'yāⁿ yeⁿe iⁿ'yeeⁿdí 'cūū. ⁴¹Tiicá ntúūⁿ 'yáⁿā, ní 'iīyū, ní 'iīⁿnyúⁿ, ni nducyaaca ní dēveē cá ní 'āā vi'í caā. Nguaaⁿ 'íiⁿnyuⁿ s'eeⁿ chi dēveē, nguēē dáámá tí 'āā vi'í caā. ⁴²Tiicá ntúūⁿ cuerpo yeⁿe yú, ch'iī yú ní choō cuerpo yeⁿe yú, naati taachi nnduuchi yú yeⁿe nguaaⁿ tináⁿā, 'āā ntéē nuuⁿndi yú. ⁴³Maaⁿ ní idinuunⁿdi yú ni 'cuināaⁿ yú cáāvā cuerpo yeⁿe yú. Naati taachi nnduuchi yú yeⁿe nguaaⁿ tináⁿā, tuuⁿmi ní cuerpo yeⁿe yú ní dēve, ní n'daacā canée. ⁴⁴Maaⁿ ní cuerpo yeⁿe yú ní yeⁿe iⁿ'yeeⁿdí 'cūū ni 'cuūvi yú. Ní taachi nnduuchi yú yeⁿe nguaaⁿ tináⁿā, tuuⁿmi ní cuerpo yeⁿe yú ní yeⁿe espíritu. Nduuti chi vée cuerpo yeⁿe yú chi yeⁿe iⁿ'yeeⁿdí 'cūū, tuuⁿmi ní vée cuerpo yeⁿe yú chi yeⁿe espíritu.

⁴⁵Canée nguūⁿ ndii cuááⁿ vmnaaⁿ na libro yeⁿe Dendyuūs 'tíicá: Dendyuūs din'dái yā cuerpo yeⁿe

saⁿā Adán chi sáⁿā chí cunduuchi sá vmnááⁿ vmnaaⁿ. Naati táámá Adán chí cuayiivi ní nguuvi yā Jesucristo. Ní Jesucristo miiⁿ ní yeⁿe vida chi espíritu chi canduuchi. Ní Jesucristo ca'á yā vida 'iiⁿ'yāⁿ s'eeⁿ yeⁿe iⁿ'yeeⁿdí 'cūū chi vida chi yeⁿe espíritu. ⁴⁶Nadacadiīnuuⁿ ní yeⁿe chuū. Vmnááⁿ vmnaaⁿ vée cuerpo tan'dúúca cuerpo yeⁿe s'uúúⁿ, ní cuayiivi vée cuerpo chi yeⁿe espíritu. ⁴⁷Dendyuūs din'dái yā Adán chi saⁿa vmnááⁿ vmnaaⁿ yeⁿe yaⁿá 'cūū. Naati saⁿā cuayiivi miiⁿ chiicā sa ná va'ai cheeti nguuvi ní saⁿā miiⁿ chí Jesucristo. ⁴⁸Nducyáácá 'iiⁿ'yāⁿ yeⁿe iⁿ'yeeⁿdí 'cūū canée ndúúcū cuerpo tan'dúúca 'iiⁿ'yāⁿ yeⁿe iⁿ'yeeⁿdí 'cūū. Nducyáácá 'iiⁿ'yāⁿ chi yeⁿe Cristo cuuvi canée ndúúcū cuerpo tan'dúúca cuerpo yeⁿe Jesucristo chi yeⁿe va'ai cheeti nguuvi. ⁴⁹Maaⁿ ní cuerpo yeⁿe yú tan'dúúca cuerpo yeⁿe 'iiⁿ'yāⁿ yeⁿe iⁿ'yeeⁿdí 'cūū. Cuayiivi ní ndaāca yú 'áámá cuerpo yeⁿe yú tan'dúúca chi vée na va'ai cheeti nguuvi.

⁵⁰Maaⁿ ní chuū ngaⁿá ngii ndís'tiī hermanos yeⁿe: Ndúúcū cuerpo yeⁿe yú ndúúcū yuūtē yeⁿe ndúúcū yuūuⁿ yeⁿe nguée cuuvi ndaa yú na va'ai cheeti nguuvi. Ndí nguée vée 'áámá cuaaⁿ dendú'ū chí nchoo ndúúcū chi nguée nngoō. ⁵¹Quin'diichí nī. 'Úú ní ngaⁿá n'g'iⁿí ndís'tiī yeⁿe 'áámá cosa chi 'iiⁿ'yāⁿ nguēē deenu yā. Nguée nducyaaca yú 'cuūvi yú. Naati Ndyuūs téē yā nducyaaca s'uúúⁿ 'áámá cuerpo chí ngai tan'dúúca cuerpo yeⁿe yā chi yeⁿe espíritu. ⁵²Ní 'áámá tiempo 'lífⁿ

'lín nūuⁿ tan'dúúcā chi 'áámá ingaaⁿ
 'áámá in'gaadi nduutinaaⁿ yú, mááⁿ
 n'cheetē nūuⁿ, ní n'daaⁿ cuerpo yeⁿē
 yú, taachi 'cuēcú trompeta chí
 ndii na 'cuiinu. Ní taachi 'cuēcú
 trompeta miiⁿ, tuu'mi ní 'iiⁿyāⁿ chi
 i'téenu yā Señor Jesucristo chi
 maaⁿ ní 'āā tináⁿā ní nducuéⁿ yā
 yeⁿē nguaaⁿ tináⁿā ndúúcū cuerpo
 ngai yeⁿé yā chi 'āā ntéé choo.
 Ní 'tiicā ntūūⁿ. S'uuúⁿ chi i'teenu
 yú Jesucristo ní canduuchi yú, ní
 n'daaⁿ cuerpo yeⁿe yú. ⁵³Cuerpo
 yeⁿe yú chí ngoō. Ní Ndyuūs canéé
 chí n'daaⁿ yā cuerpo yeⁿē yú ní
 téē yā s'uuúⁿ táámá cuerpo chí
 nguée nchoo. Cuerpo yeⁿē yú chí
 n'gii, Ndyuūs canéé chí téē yā s'uuúⁿ
 táámá cuerpo chi 'āā ntéé ndaa
 nguuvi chi 'cuūvi. ⁵⁴Taachí cuerpo
 yeⁿē yú chí n'gii ní ngoo, 'āā n'daaⁿ
 cuerpo yeⁿe chi nguée cuuvi n'gii
 ndíí nguée cuuvi chōō. Tuu'mi cuuvi
 cuaacu chi canéé nguūⁿ ndii cuááⁿ
 vmnaaⁿ na libro yeⁿe Ndyuūs 'tíicā:
 Vida cueⁿe daāⁿmaⁿ miiⁿ ní chicheé
 yeⁿē vaadi n'gii miiⁿ ti 'āā ntéé ch'ii
 'iiⁿyāⁿ. ⁵⁵Vaadi n'gii ni 'āā chó'ōo.
 ¿Táácā cuuvi cuchéé vaadi n'gii
 yeⁿe 'iiⁿyāⁿ chi nguée cuuví 'cuūvi
 yā? ¿Táácā cuuví diiⁿ vaadi n'gii miiⁿ
 tan'dúúcā chi 'áámá 'iiti chí nga'a
 ti 'iiⁿyāⁿ ní n'gii yā? Nguée cuuvi.
⁵⁶Nuuⁿndi miiⁿ chi diiⁿ yú, chííⁿ chi
 tee lugar vaadi n'gii, ní n'gii yú. Ní
 vaadi n'gii miiⁿ diiⁿ tan'dúúcā chí
 nga'a ti 'iiⁿyāⁿ ní n'gii yā. Ley miiⁿ
 chííⁿ chi diiⁿ chi 'iiⁿyāⁿ deenu yā
 chí véé nuuⁿndi yeⁿe yā. ⁵⁷Nca'a
 yú gracias Ndyuūs, ti nginneé yā
 s'uuúⁿ chi ichē yú yeⁿe nducuéⁿe
 chi yeⁿē yááⁿn'guiinūuⁿ cáávā
 Señor Jesucristo yeⁿē yú. ⁵⁸Cáávā

chuū ndís'tii hermanos yeⁿé chi
 neⁿe taaví, 'cueetinééⁿ n'daaca nī
 ndúúcū chiíⁿ chi i'téenu nī. Ní nguée
 n'daaⁿ chííⁿ chi i'téenu nī. Ní cueⁿe
 daāⁿmaⁿ dííⁿ nī ntiiⁿnyuⁿ yeⁿe
 Señor Jesucristo yeⁿē yú. Ní deenú
 nī chí ntiiⁿnyuⁿ miiⁿ ní véé chiiⁿvē.

Yeⁿe ofrenda caavā hermanos

16 Maaⁿ ní neⁿé caaⁿmáⁿ
 ndís'tii yeⁿe ofrenda yeⁿé
 nī chi ca'a nī 'iiⁿyāⁿ chi i'téenu yā
 Jesucristo cáávā 'iiⁿyāⁿ ndaachí
 snée yā ní nguée dendu'u yeⁿē.
 Dííⁿ nī tan'dúúcā chí 'úú ngaⁿá
 ngii 'iiⁿyāⁿ yeⁿe tanáⁿā yáacū s'eeⁿ
 na yáⁿāa Galacia. ²Tíicā dííⁿ nī.
 Nguuví vmnááⁿ vmnaaⁿ yeⁿé ndēētē
 chi domingo miiⁿ, ca'áámá ca'áámá
 ndís'tii ní cu'néeⁿ nī 'āā víí caā
 parte yeⁿé nī chi tunééⁿ Ndyuūs chi
 yeⁿe nducuéⁿē chi Ndyuūs tee yā
 ndís'tii. Ní ndís'tii ca'a nī ofrenda
 yeⁿé nī na ta'a 'iiⁿyāⁿ chí ngaⁿa
 ntiiⁿnyuⁿ yeⁿe yáacū. Ní taachi
 'úú ndaa nguée canéé chi ca'a nī
 ofrenda yeⁿe nī. ³Ní taachi ndaa,
 'úú dicho'ó 'iiⁿyāⁿ chi ndis'tii ne'éⁿ nī
 chi candéē yā ofrenda yeⁿé nī ndíí
 yáāⁿ Jerusalén. 'Iiⁿyāⁿ miiⁿ candéē
 yā carta yeⁿé ndúúcū ofrenda yeⁿe
 nī. ⁴Nduuti chi 'úú canéé chi caⁿá
 yáāⁿ Jerusalén tuu'mi 'iiⁿyāⁿ s'eeⁿ
 caⁿá yā nduucú.

Pablo caⁿa yā chi caⁿá yā yāāⁿ s'eeⁿ

⁵Canéé chi cho'ó na yáⁿāa
 Macedonia. Ní taachi cho'ó na
 yáⁿāa miiⁿ cuayiivi ní ndaa na yáāⁿ
 Corinto ní cuneé ndúúcū ndís'tii.
⁶Neⁿé chi cūnēē ndúúcū ndis'tii
 tiempo chi 'iicheē. Ní cuayiivi ní
 ndís'tii cuuvi caⁿá nī nduucú 'téé

nūuⁿ naachi 'úú naⁿá cuaaⁿ cyúúní.
 7Nguéé neⁿé n'diichí ndís'tii taachi
 cho'ó yáaⁿ vaacú nī, naati canéé
 ngiinú chi ndaa n'diichí ndís'tii
 'áamá tiempo nduuti chi Ndyuūs tée
 yā lugar 'úú. 8Naati cuneé na yáaⁿ
 Efeso ndii tiempo yeⁿe 'viicu yeⁿe
 Pentecostés. 9Miiⁿ ní véé n'dee ca
 ntiiⁿnyuⁿ chi dííⁿ. Ní yáaⁿ Efeso miiⁿ
 tan'dúúcā 'áamá cheendi va'āi chi
 ch'ēete n'dai ni ndeēvéé n'dai caavā
 'úú, ti véé cá ntiiⁿnyuⁿ chi dííⁿ. Miiⁿ
 ntúúⁿ neene vee 'iiⁿyāⁿ chi induuví
 táaⁿ yā yeⁿé.

10Ndúúti chi ndaa saⁿā Timoteo
 nanááⁿ ndís'tii, canéé chi dííⁿ nī
 recibir saⁿā miiⁿ tan'dúúcā 'áamá saⁿā
 chi dííⁿ ntiiⁿnyuⁿ sa yeⁿé Ndyuūs, ti
 saⁿā miiⁿ ní idiiiⁿ sa ntiiⁿnyuⁿ yeⁿé
 Ndyuūs tan'dúúcā 'úú. 11Mar 'áamá
 ndís'tii nguéé dííⁿ nī ndúúcu Timoteo
 tan'dúúcā chi saⁿā chi nguēe ndaacā,
 ní nguéé deenu sa. Cuaviivi taachi
 dicho'ó nī Timoteo miiⁿ cuaaⁿ cyúúní,
 dicho'ó nī saⁿa miiⁿ ndúúcu n'dai.
 Canee ngiinú chi ndaa sa ndúúcu
 tanáⁿā hermanos nanááⁿ 'úú.

12'Úú neⁿé chi hermano Apolos
 ndaa sa nanááⁿ ndís'tii taachi ndaa
 tanáⁿā hermanos. Apolos miiⁿ nguéé
 neⁿe sa ndaa sa maaⁿ, naati ndaa sa
 nanááⁿ ndís'tii taachi véé yaaⁿ sa.

Pablo dííⁿ yā saludar hermanos

13'Cueéte n'daacá nī ndúúcu cuidado.
 Ní 'cuēetinéé n'daacá nī ndúúcu
 chi i'téenu nī chi yeⁿe Ndyuūs.
 Ní tan'dúúcā saⁿā n'gēete dííⁿ yā
 ní 'tífcā dííⁿ nī. Ní cunéé diitú nī.
 14Tanducuéⁿē chi dííⁿ nī, ní dííⁿ nī ti
 neⁿe nī Ndyuūs.

15Ndís'tii ní deenú nī chi 'iiⁿyāⁿ
 yeⁿe va'āi saⁿa Estéfanos s'téenu yā

Jesucristo vmnááⁿ vmnaaⁿ taachi
 snee yā na yáⁿāa Acaya. 'Úú yaa'ví
 ndís'tii chi 'iiⁿyāⁿ s'eeⁿ neⁿé yā dííⁿ
 yā ntiiⁿnyuⁿ chi nginne nducyaaca
 'iiⁿyāⁿ chi i'téenu yā Señor Jesucristo
 yeⁿé yú. 16'Úú ngiicá ndís'tii
 hermanos yeⁿé, chi 'caandiveéⁿ nī
 yeⁿe chi ngaⁿā 'iiⁿyāⁿ s'eeⁿ yeⁿe
 va'ai Estéfanos ní cunneé nī 'áamá
 'áamá 'iiⁿyāⁿ chí idiiiⁿ ntiiⁿnyuⁿ yeⁿé
 Dendyuūs. 17Yeenú chi ndaa hermano
 Estéfanos ndúúcu hermano Fortunato
 ndúúcu hermano Acaico. N'daacā chi
 canéé yā ndúúcu nī na lugar yeⁿé.
 18'Iiⁿyāⁿ s'eeⁿ ní nduūvi n'daí yā na
 espíritu yeⁿé ní caⁿá yā nduūvi n'daí
 yā na espíritu yeⁿe nī dendú'ū. Canéé
 chi dííⁿ nī aceptar tanáⁿā 'iiⁿyāⁿ chi
 dííⁿ yā tan'dúúcā 'iiⁿyāⁿ s'eeⁿ.

19'Iiⁿyāⁿ yeⁿe yaācu yeⁿe yáⁿāa
 Asia dicho'ó yā saludos yeⁿé nī: N'daí
 nī, ngaⁿa yā. Saⁿa Aquila ndúúcu
 n'daataá Priscila ndúúcā 'iiⁿyāⁿ yeⁿe
 yaācu chi snee yā ndavaacú yā
 dicho'ó yā saludos yeⁿe nī: N'daí nī,
 ngaⁿa yā. 20Nducyáácā hermanos
 ní dicho'ó yā saludos yeⁿe nī: N'daí
 nī, ngaⁿa yā. Ndís'tii ní caaⁿmaⁿ nī
 'tífcā yeⁿe hermanos: N'daí yā, ngaⁿa
 nī. Ní ca'á nī ta'a nī taachi dííⁿ nī
 saludar hermanos ti ndís'tii ní neⁿé nī
 Dendyuūs.

21'Úú Pablo dingúúⁿ carta miiⁿ
 ndúúcu ta'á, ní: N'daí nī, ngaⁿā.

22Nduuti chi 'áamá saⁿā nguéé
 idinéⁿe yā Señor Jesucristo yeⁿe yú
 'āa cuuví yā condenado. Niiⁿnuⁿ niiⁿnuⁿ
 canee tiempo chi Señor Jesucristo
 yeⁿé yú cuuvi ndaa ntúuⁿ yā.

23Ní Señor Jesucristo yeⁿe yú tée
 yā ndís'tii nducuéⁿē chi n'daacā
 yeⁿe yā. 24'Úú neⁿé ndís'tii ti ndís'tii
 ní yeⁿe Cristo Jesús ndís'tii. 'Tífcā.